

Ayóoba

Ubbite gi

Téereb *Ayóoba* moo nettali dundu nit ku baax ku musiba mu réy dal. Alalam jépp la jékka ñàkk, teg ci ñàkk doomam yépp, boole ci jàngoro ju daw yaram. Gannaaw loolu, téere bi indi na ñetti pàcci wàqante yu taalife yu Ayóoba séq aki xaritam, te lépp di biral seeni tont ci tiis yooyu. Li gëna fés ci seen werante moo di ni Yàlla farala jëflantee ak doom aadama, waaye Yàlla ci boppam moo mujj feeñu Ayóoba.

Xariti Ayóoba yi, ni ñu jàngate tiisi Ayóoba mooy ni ko aaday cosaan gise ci wàllu diine rekk. Foog nañu ne, gannaaw Yàlla mbaax la mas di yoole jëf ju baax, di añale mbugal jëf ju bon, coono yi Ayóoba daj, añub bàkkaaram donj lay mana doon. Teewul Ayóoba xamle ne mbir mi yombewul noonu, te it yelloowul mbugal mu mettee ni li ko dal lépp, ndax moom ci boppam, mbaax geek njubte gi mu masa jàppoo, barewu ciy moroom. Xelum Ayóoba moo manula jàpp nan la Yàlla mana seetaane yooyu coono di dikkal ku mel ni moom. Moo tax mu am fitu dëkk Yàlla ci layoo bu mu bégga séq ak moom. Taxul Ayóoba gëmadi, waaye nammeelam moo di mu am dëgg fi kanam Yàlla, ak itam firnde ju setal deram, gannaaw moom nit ku baax la.

Li Ayóoba laaj nag, Yàlla àdduwu ci, waaye ngëmu Ayóoba la tontoo kàddu gu jeexal aw lay, ci ab taalif bu mu misaale ne moo man te moo xam. Gannaaw loolu la Ayóoba nangu ne Yàlla mooy Buur te moom rekk a xam. Ci kaw loolu la tuub waxi meram ju ëpp.

Tëjteb téere bi moo nettali ni Ayóoba mujje. Xariti Ayóoba ya nag la Yàlla sikke kàddu yu dëng ya ñu firee coonoy Ayóoba. Mennum Ayóoba donj moo njort ne màggug Yàlla weesu na ni xaritam yooyu fooge Yàlla, ci seen gis-gis bi leen diiney cosaan gisloo.

Ayóoba

1

Ayóobaa barkeel, ragal Yàlla

¹ Amoon na ca réewum Ucc^a, góor gu ñuy wax Ayóoba. Góor googu nekkoon ku mat te jub, ragal Yàlla te dëddu lu bon. ² Amoon na juróom ñaari doom yu góor ak ñetti ñu jigéen. ³ Alalam juróom ñaari junniy (7 000) gàtt la woon, ak ñetti junniy (3 000) giléem, ak juróomi téeméeri (500) lëkkey nag yuy rijji, ak juróomi téeméeri (500) mbaam yu jigéen, ak jaam yu bare lool. Góor googu daal moo ëppoon daraja ca mboolem waa penku.

⁴ Doomi Ayóoba yu góor ya nag dañu daa ay-ayloo berndey biir kër, ku nekk ak bésam. Su ko defee ñu yónnee, woo ca seen ñetti jigéen ña, ngir ñu bokk di lekk ak a naan. ⁵ Bu ñu demaan ba ñépp fégal, Ayóoba day yónnee ngir sell-luloo leen. Ci biir loolu day teela xëy, daldi leen joxeel ñoom ñépp ba ñu daj ^o*saraxu rendi-dóomal, ku nekk benn. Booba Ayóoba da naan: «Jombul sama doom yii bàkkaar nañu mbaa ñu xarab Yàlla ci seen xel.» Noonu la Ayóoba jàppoo woon bés bu nekk.

Nattu nuyoo na

⁶ Mu am bés goney Yàlla dikk, teewsi fa *Aji Sax ji. Seytaane tuumaalkat bi itam bokk ca. ⁷ Aji Sax ji ne Seytaane: «Ana foo jóge?» Mu ne: «Ci wër-wëraan ak doxantoo àddina laa jóge.» ⁸ Mu ne ko: «Xanaa seetlu nga Ayóoba, sama jaam bi! Amul moroom fi kaw suuf de! Ku mat la te jub, ragal Yàlla te dëddu lu bon.» ⁹ Mu ne ko: «Ayóoba daa ragal Yàlla ci neen a? ¹⁰ Xanaa du yaa ko ñag, ñag këram ak mboolem alalam, ba mu daj? Liggéeyam, nga barkeel, ba ag juram law ci réew mi. ¹¹ Xàccil sa loxo rekk, dal ci mboolem lu bokk ci moom. Ndegam du jàkkaarlook yaw, xarab la.» ¹² Aji Sax ji ne Seytaane: «Ayca boog! Mboolem lu bokk ci moom a ngi ci say loxo, waaye moom ci boppam, bu ko sa loxo laal.» Ba loolu amee Seytaane bàyyikoo fa Aji Sax ji.

¹³ Mu am bés doomi Ayóoba yu góor ak yu jigéen bokk toog di lekk ak a naan biiñ ca seen kër taaw. ¹⁴ Ci biir loolu ndaw dikk ne Ayóoba: «Nag ya daal a doon rijji, mbaam ya di for ca wet ga. ¹⁵ Genn gàngooru yàqkat bàyyikoo Saba, dikk daanu ci seen kaw, yóbbu leen; surga ya, ñu leel ñawkay saamar. Mennum man mii maa ca rëcce ba àggesi la ko.» ¹⁶ Kooku daaneelagul kàddoom sax, keneen dikk ne: «Sawaraw Yàlla daal a wàcce asamaan, boole gàtt yaak surga ya, jafal ba xoyom leen. Mennum man donj maa ca rëcce ba àggesi la ko.» ¹⁷ Kooka daaneelagul kàddoom, keneen dikk ne: «Kaldeen ñaa def ñetti gàngoor, dikk sèxëtoo giléem ya, yóbbu,

^a**1.1 Ucc:** jombul ma nga woon ca penkub Israyil, fi ñuy wax tey Arabi mbaa Yordani mbaa Siri.

Ayóoba

surga ya, ñu leel leen ñawkay saamar. Mennum man donɗ maa ca rēce ba àggesi la ko.» ¹⁸ Kooka daaneelagul kàddoom, keneen dikkati ne ko: «Sa doom yu góor ak yu jigéen a doon lekk ak a naan biiñ ca seen kër taaw. ¹⁹ Ngelaw lu mag jekki bàyyikoo ca wàllaa màndiɗ ma, dal ca ñeenti weti néeg ba, mu màbb ca kaw gone ya, ñu dee. Mennum man donɗ maa ca rēce ba àggesi la ko.»

²⁰ Ba mu ko defee Ayóoba jóg, ne tareet mbubbam, ba noppi watu nel, di ko ñaawloo. Mu daanu fi suuf, sujjóot, ²¹ daldi ne: «Duɗɗ laa génne sama biiru ndey te duɗɗ laay delloo. Aji Sax jee maye, Aji Sax jee nangu. Cant ñeel na Aji Sax ji.» ²² Ci biir loolu lépp Ayóoba bàkkaarul, jiiñul Yàlla lenn lu juunu.

2

Nattu nuyooti na

¹ Mu am bés goney Yàlla dikk, teewsi fa *Aji Sax ji. Seytaane itam bokk ca, dikk teewsi fa Aji Sax ji. ² Aji Sax ji ne Seytaane: «Ana foo jóge nii nag?» Mu ne ko: «Ci wër-wëraan ak doxantoo àddina laa jóge.» ³ Mu ne ko: «Xanaa seetlu nga Ayóoba, sama jaam bi! Amul moroom fi kaw suuf de! Ku mat la te jub, ragal Yàlla te dëddu lu bon.» ⁴ Seytaane ne Aji Sax ji: «Bakkan a wuutu bakkan rekk. Mboolem lu nit am, man na koo weccee bakkanam. ⁵ Léegi xàccil sa loxo rekk, dal ci kaw jëmmam jépp. Ndegam du jàkkaarlook yaw, xarab la.» ⁶ Aji Sax ji ne Seytaane: «Kon mu ngoogu say loxo. Waaye bakkanam daal, sàmm ko.» ⁷ Ba mu ko defee Seytaane bàyyikoo fa Aji Sax ji. Ci kaw loolu mu sànni Ayóoba ay taab yu metti, dale ko ca téstën ma, ba ca kaw bopp ba. ⁸ Mu wut tojitu njaq, di ko xasanoo, daldi toog ci biir jalub dóom. ⁹ Jabaram ne ko: «Yaa ngi ɗoy ci sa mat gi ba tey? Xarabal Yàlla boog te dee!» ¹⁰ Mu ne ko: «Waxi jeeg bu dof daal ngay wax, yaw! Du Yàlla da nuy may lu baax, nu jël? Kon kay bu nu mayee safaan ba it, nu wara jël.» Ci biir loolu lépp Ayóoba bàkkaarul ciw làmmiñam.

Ayóoba am nay gan

¹¹ Gannaaw loolu ñetti xariti Ayóoba ñoo dégg mboolem musiba moomu ko dikkal. Ku nekk ci ñoom jóge këram: Elifas waa Teman ba, ak Bildàdd waa Suwa ba, ak Cofar waa Naama. Ñu bokk daje ngir dikk mas-sawu Ayóoba, dëfal ko. ¹² Ñu dikk ba jub ko, di ko séentoo fu xawa sore, waaye xàmmeetuñu ko. Ñu daldi ne yikkét jooy. Ba ñu agsee ku ci nekk ne sa mbubb tareet. Ñuy ñaawlu, di tibb suuf, di sànni ca kaw, muy sottiku ci seen kaw bopp. ¹³ Bokk nañu toog ak Ayóoba fa suuf juróom yaari bëccëg ak juróom yaari guddi, kenn waxu ko baat, ndax dañoo gis mitit wa mu àndal tar lool.

3

Ayóoba rëbb na bésuub juddoom

- ¹ Gannaaw loolu Ayóoba àddu,
ma ngay móolu bés ba mu juddoo. ² Mu ne:
³ Sànkute ñeel na bés ba ma juddoo,
ba ca guddi ga noon: «Sosees na góor!»
⁴ Boobu bés yal na di lëndëmu neen,
di bés bu Yàlla ma fa kaw faaleedi,
te genn leer du ko leeralati.
⁵ Yal na lëndëmu njaniiw aakimoo boobu bés,
xàmbaar mbaaral ko,
muy guddig digg bëccëg gu raglu.
⁶ Googu guddi yal na ko lëndëm moom,
yàlla bumu bége fi digg bési at mi,
yàlla bees ko limaaleeti ci weer yi.
⁷ Googu guddi kay yàlla bu ci gone sosooti,
yàlla bu ci sarxolle jolleeti.
⁸ Yal na alagkati bés yi alag googu guddi,
alagkat yu mana xabtal ninki-nànka.
⁹ Yal na biddiwi njëlam giim,
muy séentug leer te du am;
yàlla bumu gis fu njël di xippee,
¹⁰ gannaaw moo tējul sama biiru ndey,
ba làq saay gët coono.
- ¹¹ Moo lu ma tee woona deeye biiru yaay?
Lu ma tee ne putt, dog, boog?
¹² Ana lu may óom doon uufe?
Ana lu ma doon nàmpey ween?
¹³ Tëdd koon naak jàmm biir bàmmeel,
di nelaw, nopploondook
¹⁴ buur yeek jawriñi àddina,
yi tabaxal seen bopp, këri buur yu gental tey.
¹⁵ Nopplu koon naak garmi yay boroom wurus,
te daan feesal seeni kër, xalis.
¹⁶ Mbaa ma mel koon ni lumb wu làqu biir suuf,
mbaa cuux mu jotula gis ug leer.
¹⁷ Biir bàmmeel la ñu bon ñiy noppee sonle,
fa la ña jeele doole nopploo,
¹⁸ ña ñu tējoon ne finaax,
dégatuñu coowal ku leen di sas,
¹⁹ ku tuut ak ku mag di fa benn,
jaam noppi faa jaamu sangam.
²⁰ Boroom tiis, ana lees koy maye leeru kaw suuf?
Lu boroom naqar di doye bakkan?

Ayóoba

²¹ Ku ni mel ku yàkkamti dee gu dikkul,
te gëna sàkku dee alal ju làqu,

²² ba bu gisoon bàmmeeel,
di textexi ci biir mbég ak bàmneex.

²³ Ngóor sii aw yoonam làqu,
ana lu muy doye dund,
te Yàlla dar kepp ko?

²⁴ Samay binni di samaw ñam,
samay yuux fettax nim ndox.

²⁵ Tiitaange déy a ma dikkal,
li ma ragaloon kay a ma dab.

²⁶ Du jàmm, dug dal, du noflaay bu ma am,
jallaañoo dikk na!

4

Elifas nee yaru Yàlla du ñàkk

¹ Elifas waa Teman ba àddu ne:

² Ma jéema àddu boog, soo ma talee!
Ndaxad noppeeti, maneesu ko.

³ Yaw de, ñu bare jàngal nga leen,
loxo yu toqi woon, nga dooleel,

⁴ ku jangoon, nga wax, mu taxaw,
kuy óomam dammoon, nga dëgéral.

⁵ Léegi muy yaw, nga yoqi;
mbir mi dal fi sa kaw, nga jànnaxe.

⁶ Xanaa du sag ragal Yàllaay sa cëslaay,
sag maandute di sa yaakaar?

⁷ Seetal rekk, ana jaamburu Yàlla bu masa sàнку?
Ana foo gis ku jub ku mujje yàqu?

⁸ Li ma gis daal, ku bey ñaawtéef,
ji coono, yaa koy góob.

⁹ Yàllaay wal noowam, nga sàнку,
sànjam gelaw, nga jeele.

¹⁰ Gaynde ñar, segg xiiru,
selli waxambaaney gaynde tojandoo.

¹¹ Gaynde ga ñàkk um pàdd, dee,
doomi gaynde ga tasaaroo.

¹² Man la kàddu dikkal ci kumpa,
sama nopp taataan ndéey la,

¹³ ci géntu guddi, fa xalaat di jaxasoo,
nelaw yu xóot dikkal boroom.

¹⁴ Tiitaange ne ma taral, may lox,

Ayóoba

cér yépp di kat-kati.

¹⁵ Ngelaw lu sew jaare sama kanam,
sama kawari yaram ne sàyy-sàyyaaral.

¹⁶ Mu def ku taxaw, te xàmmiwuma ko,
di jëmm ju janook man, may gis.

Mu jëkke ne cell, mujje àddu, ma dégg.

¹⁷ Mu ne: «Nit man naa am njekk fa kanam Yàlla?
Am man naa laab fi kanam ki ko sàkk?

¹⁸ Ndegam surgaam ya ca asamaan sax wóoluw leen,
ay malaakaam sax, mu sikk leen,

¹⁹ gën ñi dëkke këri ban,
cosaano ci pëndub neen,

gëna neexa nappaaje gunóor.

²⁰ Diggante subaak ngoon, ñu moxoño,
bala ngaa yég, ñu sàunku fàww,

²¹ seen buumi xayma foqatiku,
ñu dee ci biir ag umple.»

5

¹ Rikk wooteel, ndegam am na ku lay wallu!
Ana ci ñu °sell ñi, kan ngay sàkku ndimbal?

² Am sannax déy, naqari deret a koy rey,
ab téxét, xéraangee koy faat.

³ Maa gis am sannax, mu saxi reen,
ma jekki ñaan alkàndey dëkkuwaayam.

⁴ Ay doomam ay sore yoonu mucc,
ñu di leen dëggaate ca pénc ma,
te kenn du leen xettli.

⁵ Am ngóobam, ku xiif a koy lekk,
ba lekkaale la saxe biir dég ya,
te alalam, ku mar a koy ñaf-ñafee.

⁶ Aw ay du garab, bay fëlle biir suuf,
coono du jekki, jebbi.

Ku juddu, coono nga juddul,
mooy ferñent, kaw rekk la jëm.

⁸ Man de su ma doon yaw damay sàkku Yàlla,
te kon Yàlla laay diis sama mbir.

⁹ Keey def jëf ju màgg ju nattuwl,
di def kiraama yu limuwul.

¹⁰ Keey taw, suuxat suuf,
yónnee ndox, nàndal ub àll.

¹¹ Keey kaweel ku suufe,
kuy ñaawlu siggee mbégte.

¹² Keey neenal pexem ku muus,
ba mébétam du sotti.

Ayóoba

¹³ Keey kepp boroom xel cig muusam,
ba pexem ndëngteem teela sooy.

¹⁴ Ñu ni mel, bëccëg ñu dajeek lëndëm,
di làmbatoo digg bëccëg ni bu doon guddi.

¹⁵ Yàllaay musal néew-ji-doole ci saamaru làmmiñ
ak loxol boroom doole,

¹⁶ néew-ji-doole jagoo yaakaar,
defkatu njekkar ub gémmiñug boppam.

¹⁷ Ma ne, ndokklee ku Yàlla jubbanti,
kon bul bañ yarub Aji Kawe ji.

¹⁸ Moom kat mooy mitital, di fajtal;
mooy gaañe, di wérale loxol boppam.

¹⁹ Juróom benni njàqare teew, mu xettli la ca,
ba ko juróom yaareel sax, doo ca loru.

²⁰ Ab xiif, moo la cay jote ba doo dee,
ab xare, nga mucc ñawkay saamar,

²¹ aaytéefu làmmiñ, nga fegu ca,
te yàqule guy dikk, doo ko ragal.

²² Yàquleek ub xiif, nga kekku;
rabu àll, doo ko ragal.

²³ Doji àll bi sax, °*kóllëreg jàmm ngay séq ak ñoom,
te ndundati àll bi dañuy jàmmook yaw,

²⁴ nga xam ne sa xayma, jàmm,
soo nemmikoo sa parlu, dara du ca wuute.

²⁵ Dangay ràññee ni saw askan di yaatoo,
say sët di law ni gàncax.

²⁶ Ni pepp di ñore, ñu door koo góob,
ni ngay màggataale doole, doora dëgmal bàmmeel.

²⁷ Lii kat lanu gis, te lii rekk la.
Dégg, jariñu.

6

Maa yey ne ba ma

¹ Ayóoba daldi ne:

² Éy su sama tiis wii doon lu ñuy natt diisaayam?
Su sama ay wii wépp doon lees di màndaxe?

³ Kon tey mu gëna diis suufoo suufi géej.
Moo waral sama kàddu yi ma rëcc.

⁴ Da di fetti Aji Man jee ma jam,
ba tooke ji nàndal samam xel,
mbugalu Yàlla yu raglu làng-déral ma.

⁵ Mbaamu àll dina ñaax te tiim ñax mu tooy a?
Am nag dina nàññi te tiim um ngooñam?

⁶ Deesul lekk lu soof, loo deful xorom,

Ayóoba

rawatina lu weex li ci nen.

⁷ Sama xel a ko nanguwul,
ñam la wu ma seexlu.

⁸ Éy kuy amal sama dagaan,
ba Yàlla sottal sama yaakaar!

⁹ Yal na neex Yàlla mu nappaaje ma,
yal na afal loxoom, ne ma tipp.

¹⁰ Konoon sama ndàmpaay di li ma gàntalul
kàdduy ku °Sell ki,

te kon ma bég, di fecce biir mitit wu dul dal.

¹¹ Ana doole ju ma amati bay muñ?

Ana luy sama muj ba may dundati?

¹² Dama diw doj bay àttan lu ne?

Am yaramu xànjari laa am?

¹³ Ndax amati naa wall,

te pexe réer ma mèrr?

¹⁴ Ku ne lasiim, saña séentu xarit baaxe la,
doonte fekkul nga ragal Aji Man ji.

¹⁵ Samay xarit a ma wor ni yol moo fekk ñiis.

Daño mel ni dex yoo fekk ndox ma jeex,

¹⁶ te ba sedd bay tàggo,

ndox mu wayoon ànd caakam yuur, di seey,
mu fees dell ak ndox mu nēx.

¹⁷ Waaye bu noor biy dikk, mu wow,

tàngoor jam, mu ñiis.

¹⁸ Jëggi giléem ay wër um ndox, ba wacc seenu yoon,
saaraan ca ndànd-foyfoy ga, réer.

¹⁹ Waa jëgg ya bawoo Tema di wër ay yol,
tukkiyat ya bawoo Saba di séentuy dex,

²⁰ ba àgg fa ñu ko fooge woon, yaakaar tas,
seen kóolute mujje mbetteel.

²¹ Yeen déy, yeenay yooyu wal ci man.

Yeena gis sama njàqare, jàq.

²² Dama leena masa ñaan dara,

mbaa ma sàkkoo ci seen alal ab ger,

²³ ngir ngeen xettli ma ci loxol noon,

mbaa ngeen jot ma ci boroom doole bu néeg?

²⁴ Xamal-leen ma, man ma ne cell!

Ana fu ma juume? Wonleen ma ko!

²⁵ Kàddu yu jub da lay yey,

ana li ngeen may yedde, lu mu doon?

²⁶ Dangeen di jéema sikk samay wax,
di jàppe ngelaw kàdduy xol bu jeex?

²⁷ Ab jirim sax àttan ngeen koo tegoo bant,

Ayóoba

seen xarit sax sañ ngeen koo jaay.

²⁸ Léegi nag, rikk walbatikuleen fi man,
xanaa дума janook yeen di fen?

²⁹ Deltuleen gannaaw, bu njubadi am.
Dellootileen gannaaw, sama der set na wecc!

³⁰ Ana fu ma waxe njubadi?
Am damaa xamul lu njekkar di saf?

7

¹ Xanaa du fani doom aadama fi kaw suuf
àppu doñ-doñ la,

dundam di dundu liggéeykat bu ñu bind?

² Daa mel ni jaam bu namm keppaar
mbaa mbindaan mu yàkkamtig peyam.

³ Noonu laa séddoo ay weeri mititu neen,
jagoo ni ay guddiy coono.

⁴ Damay tēdd te naa:

«Kañ laay jóg nag?»

Waaye guddi gudda gudd,
walbatiku ba fajar xar génnliku na ma!

⁵ Maa ngi sàngooy sax ak àkki ban,
sama der biy xar, di wal.

⁶ Kuk kub ràbb sax
ni samay fan di jeexee ko gaaw,
poqe di jeex, te yaakaar amul.

⁷ Éy Yàlla, bul fàtte ne sama dund gii,
ag noo doṅṅ la,

te dootuma teg bēt ngēneel.

⁸ Bēt bi may gis tey du ma gisati,
dinga ma niir, fekk nekkatuma.

⁹ Niir wu naaxsaay, ne mes,
mooy ku wàcci njaniiw, du yéegati!

¹⁰ Du ñibbeeti kēram,
dēkkuwaayam dootu ko fat.

¹¹ Moo tax дума téye sama làmmiñ,
xanaa di waxe biir njàqare,
di jooye biir naqar.

¹² Dama di Géej menn mbaa Ninki-nànka,
ba nga di ma booleek ku may wattu?

¹³ Dama naan: «Naa nopploo tēraayub laltu,
ba yennikoo ab lal sama tawat,»

¹⁴ nga di ma tiitale ay gént,
di ma xoqtale ay jeneer,

¹⁵ ba ku ma xojoon sax, ma jël,
nde dee a ma gēnal dese yii yax.

Ayóoba

¹⁶ Doy na sèkk! Dunduma ba fàww;
ba ma, samay fan genn noo la!
¹⁷ Luy nit ba nga di ko gèddaal,
bay def sam xel ci moom,
¹⁸ di ko nemmiku saa yoo xëyee,
di ko nattu saa su ne?
¹⁹ Doo ma dummóoyu boog,
may ma sax fu ma wonaasoo?
²⁰ Yaw miy seetlu jaam ñi,
ma bàkkaar, lu mu lay wàññi?
Ana lu tax nga di ma diiral sa bopp nii,
ba ma mujj diis la gann?
²¹ Lu tee kon nga baal ma samag moy,
jéggal ma samag tooñ?
Léegi tey ma tëri biir suuf,
nga di ma seeta seet, fekk nekkatuma.

8

Bildàdd nee musiba, aña boroom

¹ Bildàdd ma bàyyikoo Suwa, àddu ne:
² Ana foo àppal sa wax jii?
Ngay mbel-mbeli ni callweer!
³ Ana Yàllaak safaan yoon?
Ana Aji Man jeek safaan dëgg?
⁴ Bu ko sa doom yi moyee, kay,
mu ba leen ak seen añaub tooñ!
⁵ Yaw nag soo sàkkoo Yàlla,
dagaan Aji Man ji aw yiwam,
⁶ soo muccee ayib te jub,
day daldi taxaw temm ci say mbir,
delloo la sa kërug njekk,
⁷ nga yokkoo yokku ëllëg,
ba xeeb sa démb.

⁸ Laajal rekk maas gi nu jiitu,
te teewlu seen gëstuy maam ya.
⁹ Nun xamunu, démb rekk lanu,
sunu fani kaw suuf di takkndeer suy wéy.
¹⁰ Ñi ñu jiitoo lay xamal, wax la,
tibbe seen xol yii kàddu, dénk la:
¹¹ «Ndax jàqaar dina naate fu dul ban bu tooy,
am barax dina saxe fu amul ndox?
¹² Bu ndox ma ñiisee, mooy jékka lax,
te du ñoragum bay mata dog.»
¹³ Loolooy muju képp ku fàtte Yàlla,

Ayóoba

yaakaaru yéefar, tas rekk,
¹⁴ cëslaayam màbb,
làquwaayam di lëndu jargoñ.
¹⁵ Mu wéeroo këram, kër gay yëngu;
mu ñoyu ca, muy jaayu.
¹⁶ Ku gëmadee ngi mel ni garab
gu jant biy jam, mu naat;
car yay lawe tool ba mu saxe,
¹⁷ reen ya rawaasoo ci biir jalub xeer,
muy kërug dojam gu mu ñoy.
¹⁸ Nga buddee ko bérab ba mu sax,
bérab ba jàmbo ko, ne ko: «Masuma laa gis!»
¹⁹ Geneen garab ay jebbi, wuutu ko.
Mu ngoog, ab yéefar, nii la mujam di rafete!

²⁰ Dama ne: Yàlla du gàntal ku maandu,
te du dooleel kuy def lu bon.
²¹ Moo lay may loo ree,
bay sarxolle,
²² say bañ gàccoo gàcce,
xaymab ñu bon ña gental.

9

Ayóoba nee Yàlla du ku ñuy layool

¹ Ayóoba dellu ne ko:
² Waaw, noonu la moos, xam naa ko!
Ana nu nit di ame dëgg fa kanam Yàlla?
³ Ku bégga layook Yàlla it,
mu laaj la junni, doo tontu lenn.
⁴ Moo rafet xel, bare doole!
Ana ku koy jéema të, mu jig ko?

⁵ Keey randal tund yi te duñu ko yég;
keey mer, jàllarbi leen,
⁶ gësëm suuf fa mu tege,
ay kenoom jaayu.
⁷ Keey gëdd jant bi, aaye koo fenk,
ub ràpp biddiwi asamaan.
⁸ Keey wéetoo di firi déndi asamaan,
di daagoo kawtey géej.
⁹ Moo sàkk dëlloñ gi féete bëj-gànnaar
ak jaar yi ci digg asamaan,
ak ga ca néegi bëj-saalum.
¹⁰ Keey def jëf ju magg ju nattuul,
ak kiraama yu limuwul.

Ayóoba

¹¹ Mu ngoog, daf may romb te дума ko gis,
jàll, wéy te дума ko yég.

¹² Kii, bu këfee, ana ku koy tere?
Ana ku ko naa: «Looy def nii?»

¹³ Yàlla du dánk meram,
ciy tánkam la farandooy Raxab,
ninki-nànkay géej, di gappru!

¹⁴ Ana nu ma koy àddoo, man?
Ana kàddu yu may layook moom?

¹⁵ Su sama der °setee it, дума mana àddu,
xanaa sama àttekat bii laay tinu.

¹⁶ Su ma ko woon cib layoo, mu wuyu itam,
du tax mu wóor ma ne dina ma teewlu.

¹⁷ Moom mi may rajaxee ngelaw lu réy,
te di ma gaaña gaañ ci dara,

¹⁸ mayuma sax ma astandiku,
xanaa reggal ma aw naqar.

¹⁹ Su dee kàttan, kee bare doole!
Su dee wàllu yoon, kan moo ma cay woo?

²⁰ Ma am dëgg, sama kàddu sikkal ma,
ma mucc ayib, sama kàddu teg ma tooñ.

²¹ Maa mucc ayib a? Xam!
Maa sib sama dund gii!

²² Lépp benn la rekk! Moo tax ma ne:
«Ku mucc ayib ak ku bon lay boole fàkkas.»

²³ Mbas ne jaas, rey ñu deful dara,
Yàlla di leen kekkook seen njàqare.

²⁴ Àddinaa ngi tege ci loxol ku bon,
te Yàllaa ngi muur gëti àttekat yi!
Su dul moom ana ku mu doon?

²⁵ Ab dawkat sax ni samay fan di jeexee ko raw.
Wone nañu gannaaw te gisuñu lu baax.

²⁶ Samay fan tarxiis nañu, wéy, woyof ni gaali barax,
mbaa jaxaay ju naan jàyy cim rëbbam.

²⁷ Su ma nee: «Naa fàtte sama tawat,
leeral kanam te bég,»

²⁸ du tee ma ragal mboolem samay mitit,
nde xam naa ne du tee nga topp ma.

²⁹ Ndegam maa tooñ,
ana lu may sonn, doye?

³⁰ Su ma raggoo woon saabu,
ba raxasoo xeme sax,

³¹ du tee nga tàbbal ma cim leeñ,
ba samay yére sax seexlu ma.

Ayóoba

³² Yàlla da dul nit ni man, ba may weranteek moom,
di ànd ak moom, layooji.

³³ Su amoon sax kuy dox sunu digg, jubale nu;
sañ noo boole teg loxo,

³⁴ teggil ma yetam, mu sore ma,
ba darajaam ju raglu dootu ma tiital,

³⁵ konoon ma wax ak moom te duma tiit.

Waaye gannaaw demewul noonu, man laak man!

10

Ayóoba nee lu mu def Yàlla?

¹ Maaka sib sama dund gii!

Naa afal sama kàddug tawat,
di àddoo naqaru xol.

² Dama naa Yàlla: Bu ma topp ug tooñ.
Xamal ma kay li nga may topp, lu mu!

³ Ana lu la note di jariñ,
ba ngay bañ li nga sàkke sa loxol bopp,
tey àntal pexem ku bon?

⁴ Xanaa gëti nit donj nga am,
am ni nit di gise rekk ngay gise?

⁵ Say fan daa tollook fani doom aadama,
am say at daa yem ak ati nit,

⁶ ba ngay seet fu ma ñaawe,
di liñbat fu ma moye?

⁷ Moona xam nga xéll ne tooñuma,
te amul kenn kuy xettli nit ci sa loxo.

⁸ Say loxoo ma mooñ, tabax ma ba ma mat sëkk,
léegi nga di ma yàq yaxee!

⁹ Rikk fàttlikul ne yaa ma tabax,
ni bu ma doon ban,
xanaa doo ma delloo xaata ci pëndub suuf?

¹⁰ Xanaa du yaa ma xelli woon ni meew
ci sama biiru ndey,
wayal ma nim soow,

¹¹ wodde ma der ak suux,
ràbbe ma yax aki siddit?

¹² Yaa ma may bakkan, won ma ngor,
yaa sàmme sa yégeel samag noo.

¹³ Ndeke yoo lii nga dencoon ci sa xol,
xam naa ne lii nga naron:

¹⁴ ne ma dann, ba su ma bàkkaaree,
doo ma baal samag tooñ.

Ayóoba

- ¹⁵ Su ma defee lu bon, ngalla man,
te bi ma defee njekk it, sañumaa siggi,
gàcce laa suure, sangoo toroxte.
- ¹⁶ Waaye su may siggi rekk nga mel ni gaynde,
di ma rëbb,
dellu di ma lore say kiraama,
- ¹⁷ yónneeti ma say seede,
gën maa songati,
ay gàngoor di wuutante fi sama kaw.
- ¹⁸ Ana loo ma doon génnee sama biiru ndey?
Doon naa dee te bët du ma gis!
- ¹⁹ Doon naa mel ni ku masula am,
jóge ci biir, ñu yóbbu bàmmee.
- ²⁰ Xanaa du fan yu néew laa dese? Ba ma boog!
Xiddil, ma leqliku,
- ²¹ bala may dëddu, délsetuma,
bala may tàbbi réew mu lëndëm ga ne këruus,
- ²² réewum lëndëm,
mu ne këruus, salfaañoo,
ag leer sax, saf fa lëndëm!

11

Cofar nee tuub, raw

- ¹ Cofar ma bàyyikoo Naama àddu, ne:
² Yii kàddu yu wale, deesu ko tontoo?
Wax ju bare tax na nit a yey?
³ Sa kebetu yii wedamal na kenn a?
Am dangay ñaawle te deesu la tiiñal?
⁴ Nee nga sa àlluwa wér na péññ,
sa jëw rafet, Yàlla seede.
- ⁵ Éy su Yàlla nammoona wax,
ba àddu, wax ak yaw,
⁶ àgge la kumpay xelam mu rafet,
mi wees dég-dég,
kon nga xam ne Yàlla jéllale na sa lenni tooñ!
- ⁷ Dangaa mana gëstu mbóoti Yàlla, ba gis ko?
Am yaa ñédd Aji Man ji?
⁸ Lu gëna kawe kaw, ana loo ci man?
Lu gëna xóot njaniw, ana loo ci xam?
⁹ Mäggaayu Yàllaa sut suuf,
gëna yaatu géej!
¹⁰ Su dikkee, tëj nit,
woo ko péncum àtte, ku ci man dara?

Ayóoba

¹¹ Moom mi xàmmee ñi dul niti dara,
mooy gis lu bon, te du laaj mu teewlu.

¹² Waaye ku boppam feesul, bu muusee,
mbaamu àll a judduwaale nangu.

¹³ Waaye yaw soo defee sa xel ci Yàlla,
dékk ko say loxo,

¹⁴ fabal say ñaawtéef, sànni,
te baña xajal njubadi sa biir xayma,

¹⁵ kon déy, nga mucc gàkk, siggi;
dëju te doo tiit,

¹⁶ sa coonob tey ngay fàtte,
ni waltan mu wal ba wéy donṅ
ni nga koy fàttlikoo,

¹⁷ te yaay gëna leer jantub njolloor,
ba lëndëm di saf leeru njël.

¹⁸ Kon nga am yaakaar ak kóolute,
aaru, soo téddee, nelaw,

¹⁹ jaaxaan, kenn du la lëjal,
ñu bare di la leewaayu;

²⁰ ku bon jàq, ba gët ya giim,
rawtu réer ko,
yaakaaratul lu moy noowam gu mujj.

12

Ayóoba nee Yàlla lu ko neex lay def

¹ Ayóoba àddu ne:

² Yeen daal yeenay nit;
ngeen dee, xel mu rafet dee.

³ Ndaxam man it am naam xel ni yeen,
duma seen cuune fenn,
te lii ngeen wax, kenn umplewu ko.

⁴ Maay reetaanu xarit,
te daan woo Yàlla, muy wuyu;
tey ñuy reetaan ku jub, mucc ayib!

⁵ Ku neexlee ngi ñaawal ku safaan dab,
defe ne safaan, ku tarxiis lay bëmëx.

⁶ Jàmm a nga ca xaymay yàqkat ya,
te xel mu dal di céru tooñkati Yàlla yooyu,
ṅàbb seeni yàlla.

⁷ Laajal rekk rab yi, ñu xamal la;
mbaa njanaaw yi, ñu wax la;

⁸ mbaa nga diisook suuf, mu xamal la;

Ayóoba

mbaa jëni géej, ñu nettali la.

⁹ Ana ku umple ci mboolem ñii,
ne loxol *Aji Sax jee def lii lépp?

¹⁰ Moo yor ci loxoom lépp luy dund,
yor noowal képp kuy noyyi.

¹¹ Xanaa du nopp ay natt baat bu jib,
denqleñ di mosu ñam?

¹² Mag ak xel mu rafet,
fan wu gudd ak ràññee.

¹³ Waaye Yàllaa boole xel ak doole,
moom pexeek ràññee.

¹⁴ Mu ngoog, keey màbb te deesul tabaxaat,
di tëj nit, te deesul tijji.

¹⁵ Mu ngoog, keey aj am ndox, mu maral,
mu afal am ndox, mu salfaañe àddina.

¹⁶ Kee am doole, keey sottal,
di boroom aji réer ak ka ko réeral.

¹⁷ Keey futti kàngam,
dofloo kilifa.

¹⁸ Keey foq mbaxanam buur,
jox ko ngemb, mu gemboo.

¹⁹ Keey futti °*sarxalkat,
jàllarbi njiit lu riigu.

²⁰ Keey wedamal ku ñu wóolu,
xañ mag xelum ràññee.

²¹ Keey torxal garmi,
yolomal ngañaayu boroom doole.

²² Keey ñori lu làqoo xóotey lëndëm,
leeral lu noon këruus.

²³ Keey màggal aw xeet, teg ca fàkkas leen;
keey lawal aw xeet, teg ca toxal leen.

²⁴ Keey xañ njiitu xeet am xelam,
wërloo ko ndànd-foyfoy lu yoon amul,

²⁵ muy làmbatoo lëndëm gu genn leer amul,
moo koy wërloo ni màndikat.

13

Ayóoba nee su layoo, yey

¹ Dama ne, lii lépp maa ko gis,
dégg ko, xam ko.

² Li ngeen xam, man it xam naa ko;
duma seen cuune fenn.

³ Waaye man Aji Man ji laay waxal,
layook Yàlla laa namm.

Ayóoba

- ⁴ Yeen nag yeenay rafetalkati fen,
yeen ñépp di fajkati caaxaan.
- ⁵ Céy su ngeen noon cell,
muy seen rafet xel!
- ⁶ Ngalla dégluleen sama tawat,
teewluleen sama kàddug layoo.
- ⁷ Yàlla daal ngeen di waxal njubadi,
di ko duural?
- ⁸ Yàlla ngeen faral,
am Yàlla ngeen di layool?
- ⁹ Bu leen luqatu woon dina baax a?
Am ni ñuy naxe nit ngeen koy naxe?
- ¹⁰ Su ngeen ko faraloon ci kumpa sax,
du tee mu sikk leen moos.
- ¹¹ Xanaa màggaayu Yàlla tiitalu leen?
Am ragluwaayam ëlëmu leen?
- ¹² Seeni tari, léebi neen,
seeni tont, kiiraayu boob.
- ¹³ Xeremluleen, ba ma wax man
ak lu ma mana dal.
- ¹⁴ Ana lu ma tax di yàpp sama pàllax,
di jaay sama bakkan?
- ¹⁵ Su ma doon rey it moom laay yaakaar,
maay janook moom, layool sama bopp.
- ¹⁶ Loolu it sama mucc a ngi ci,
nde ab yéefar du dikk di janook moom.
- ¹⁷ Dégluleena déglu sama baat,
sama kàddu ci seeni nopp.
- ¹⁸ Dégluleen maa, ma lañal ab layoo,
bir na ma ne maay yey.
- ¹⁹ Ana ku may yey cib layoo?
Kon de ma wedam te dee.
- ²⁰ Xanaa nga may ma jaar rekk,
ba du jar ma di la làqu:
- ²¹ ngalla teggi ma sa loxo,
te buma dabeeti tiitaange loo sabab.
- ²² Wooteel, ma wuyu,
mbaa ma wax, nga àddu ma.
- ²³ Ana luy sama ñaawtéef aki moy?
Xamal ma samag tooñ ak sama moy.
- ²⁴ Ana loo may làqe sa leeru kanam?
Danga maa jàppe sab noon?
- ²⁵ Xob wuy wéy ngay xoqtal?
Ana boob muy naaw, loo ciy topp?
- ²⁶ Yaa ma bindal dogal yu wex,

añale ma sama ñaawtéefi ndaw!

²⁷ Yaa ma jéng,
di sàmm fépp fu ma jaare,
topp sama tànk!

²⁸ Sama bakkan a ngi ruus ni bant bu fënëx,
mbaa mbubb mu maxe.

14

Àddinaa gàtt, barew tiis

¹ Ku jigéen jur,
yaa néewi fan, géegal coono!

² Dangay tóor rekk, lax,
wéy ni takkndeer, doo toog.

³ Mooy kii nag nga teg bët,
mooy man mii nga nara layool!

⁴ Lu sobewu, ana ku ci mana am lu laab?
Du kenn!

⁵ Ndegam yaa dogalal nit ay fanam,
lim ay weeram,
dogal àpp ba, te du jaas,

⁶ teggi ko boog say gët, mu dal-lu,
ni liggéeykat bu jaanam wàcc ci bés.

⁷ Garab sax ñàkkul yaakaar.
Boo goree, mu jebbiwaat,
ba du ñàkk ay njebbat.

⁸ Reen ba man naa màggat,
ëkk ba deeye biir suuf,

⁹ mu yég um ndox, rekk, jebbi,
saxaat nim njëmbat.

¹⁰ Waaye nit dee, doole réer,
bakkan rot, mu ne mes.

¹¹ Day mel ni déeg bu ñiis,
mbaa dex gu wow ba jeex.

¹² Doom aadama it tëdd, du jógati,
du yewwooti, asamaan fekke,
du jógeeti ciy nelaw.

Làq ma sa mer, ba giif

¹³ Éy soo ma nëbboon biir njaniiw,
làq ma, ba sa mer giif,
dogalal ma àpp, te bañ maa fàtte!

¹⁴ Ndax dees na dee, di dundati?
Konoon ma muñe ko sama fani coono yépp,

Ayóoba

ba keroog sama kuutaay yiwisi ma.

¹⁵ Konoon nga woo ma, ma wuyu,
te kon nga namm sa càkkéefu loxo.

¹⁶ Konoon yaay lim samay jéego,
te doo ma topp samay bàkkaar.

¹⁷ Konoon samag tooñ yebe
ci mbuus mu takke,
sama ñaawtéef, nga muure ko malaan.

¹⁸ Waaye aw tund day màbb, ruus;
aw doj di toxu,

¹⁹ am ndox di jonji xeer ba mu jeex,
waame buub suuf, yóbbu,
te noonu ngay neenale yaakaaru doom aadama,

²⁰ man ko, mu dëddu fàww,
kanam ga soppiku, nga jalax.

²¹ Doom ya tedd, yégul;
ñu tekkeedi, tinul.

²² Nit yégul lu moy mititu boppam
te bakkanu boppam lay tiisoo.

15

Nee ñu lu waay def, boppam

¹ Elifas àddu, ne:

² Ayóoba, ku xelu dina tontoo kàdduy ngelaw,
mbel-mbelam nib jaas bu fees dënnam a?

³ Ku xelu du layoo waxi caaxaan,
kàddu yu amul lenn njariñ.

⁴ Yaw de, yaa ngi neenal worma,
di yàq njàngat mi war fa Yàlla.

⁵ Saw làmmiñ déy, sa ndëngtee koy sa,
yaa taamu di wax njublanj.

⁶ Du man de, sa gémmiñu bopp a la teg daan,
sa làmmiñu bopp a la tuumaal.

⁷ Xanaa yaa jékka juddu ci nit?
Am balaa tund yee sosu lañu la jur?

⁸ Ba Yàllay féncoo yaa doon déglu,
ba mana aakimoo xel mu rafet?

⁹ Ana loo xam lu nu xamul
ak dég-dég boo am, te nu rafle ko?

¹⁰ Boroom bijjaaw ak màggat a ngi sunu biir,
di ñu sut sa baay aw fan.

¹¹ Kàddu yi la Yàlla di mas-sawoo da laa doyul?
Boole ci li ñu lay waxe teeyu bakkan?

Ayóoba

¹² Ana looy waxe xol,
di saxaral kanam nii?

¹³ Ngay sippi Yàlla sa mer,
di ko wax lu mel nii!

¹⁴ Ana nit ku mana jub xocc?
Ana ku laab ku jigéen jur?

¹⁵ Yàlla wóluwul sax ñu sellam ña ca asamaan,
te asamaan sellul ba doy ko,

¹⁶ rawatina nit, moom mi jara seexlu,
yàqu jikko,
di def njubadi ni ndoxum naan.

¹⁷ Déglu ma, ma wax la,
xamal la li ma gis,

¹⁸ muy lu ñu rafet xel ñi jottli,
jële ko ca seeni maam, te làquñu ko.

¹⁹ Ñoom, seeni maam doṅṅ a jagoo woon réew mi,
ba leen doxandéem raxaguloon.

²⁰ Bésoo bés ku bon ay bittarñikoo biir njàqare,
te diirub at yi ñu àppal ku néeg,

²¹ coowal musiba mooy buur nopp ya,
yàqkat bette ko biir jàmm.

²² Dootu yaakaara mucc musiba,
saamar a koy yoot,

²³ muy taxawaalu, tan ya mujj xontoo,
mu xam ne bésub safaan taxaw na.

²⁴ Njàqareek tiitaangee koy èlëm,
song ko ni buur bu jekku xare.

²⁵ Moo xàccil Yàlla loxo,
di jaay Aji Man ji njàmbaar,

²⁶ danjiiral, buur, wuti ko,
yiiroo dëllaayu pakkam,

²⁷ te fekk ko yaflu ba gët suulu,
pooj ya duuf bay lob-lobi.

²⁸ Ku ni mel ay dëkke dëkk yu gental,
ci kër yu kenn dul dëkke,
kër yu nara doon jali tojit.

²⁹ Ku bon kooku du woomle, alalam du toog,
te koomam du lawe miim réew.

³⁰ Du mucc musiba,
mooy garab gu daay xoyom car yu yees ya,
Yàlla wal, mu ne mes.

³¹ Bumu yaakaar naxi neen, di nax boppam,
nde neen ay doon ab añaam.

³² Balaa jantam a lang mu jot añaam,
te caram dootu naat.

Ayóoba

³³ Day mel ni reseñ gu doom yay yolax,
mbaa oliw gu tóor-tóor yay ruus.
³⁴ Waa làngu yéefar yi duñu am kuutaay,
te xaymay lekk-kati ger yi la sawara di xoyom.
³⁵ Ñooy sos joote, wasin ñaawtéef,
ñoom la seen biir di ëmb wuruj.

16

Ayóoba gisatul yaakaar

¹ Ayóoba àddu ne:

² Kàddu yu mel nii, dégg naa ko lu bare.
Dëfalkati yokk joote yi ngeen doon, yeen ñépp!

³ Sa waxi ngelaw yii da dul jeex?
Ana lu la cuq, ba ngay wax rekk?

⁴ Su ngeen doon man, may yeen,
kon it ma mana wax ni yeen,
tuur leen baati tuuma,
wëcc leen bopp.

⁵ Waaye su doon man,
ma wax ak yeen, ba dëfal leen,
mas-sawu leen, ba ngeen giif.

⁶ Waaye su ma waxee, mitit du giif;
su ma noppee, du tax mu sore.

⁷ Yàlla kay a jeexal sama doole,
tas sama gàngoor.

⁸ Moo ma jàpp, semmal ma;
samab jeexaay seedeel ma tuuma.

⁹ Meram la ma daggatee, jéppi ma,
di yéyu ci sama kaw,
daasal ma gëti noon, ne ma jàkk.

¹⁰ Nit ñaa ngi ña ñàpp fi sama kaw,
sewal ma, di ma talaata,
dajaloo, sam ma.

¹¹ Yàlla da maa wacce ab kàccoor,
rattax ma ci loxoy ñu bon ñi.

¹² Féexoon naa, mu falaxe ma;
sëq sama ndodd, rajaxe ma,
def ma diirukaayam,

¹³ ay fittkatam gaw ma,
mu di ma butti te yërëmul,
di tuur sama sébbriit fi suuf.

¹⁴ Mooy buur ni xarekat fi sama kaw,
di ma jamat.

¹⁵ Ab saaku laa ñaw, taqoo,

Ayóoba

torox, ne dett fi suuf.

¹⁶ Sama kanam a ngi xonq curr aki jooy,
sama mbari bët bàddoo lëndëm.

¹⁷ Moona saay yoxo jëfewul coxor,
te samag ñaan lal na worma.

¹⁸ Suufoo, bul làq sama deret ji tuuru,
te yal na sama yuux jollee fu af.

¹⁹ Ma ne, tey fi tey, am naa ab seede kaw asamaan,
sama seede kay a nga fa kaw.

²⁰ Ñi may kókkali, saay xarit a,
waaye Yàlla laa koy jooy.

²¹ Na ab seede layool nit fa Yàlla,
ni doom aadama di layool moroom ma fi kaw suuf!

²² At yu néew déy a ci des,
ma dem yoon wu ma dul délisi.

17

¹ Sama xol jeex,
samay fan tàggoo,
bàmmeel di ma xaar.

² Fu ma jublu ñu di ma ree,
di ma ñaawal, may gis.

³ Ngalla Yàlla, gàddul mab daan
sama digg ak yaw,
su dul yaw, ana ku may gàddu?

⁴ Yaa fatt xelu ñii,
kon nag bu leen may ndam.

⁵ Nee ñu, ku njariñ tax nga wor xarit,
say doom a cay loru.

⁶ Man la nit ñi def léebukaay,
di ma tifli ci kanam.

⁷ Naqar tax na saay gët giim,
saa cér yépp jeex ba mel ni takkndeer.

⁸ Ku jub a ngii jommi ci lii ma dal,
ku tooñul a ngi xabtalul fi kaw yéefar yi.

⁹ Waaye aji jub a ngi topp yoonam,
boroom loxo yu °set a ngi gëna am kàttan.

¹⁰ Waaye yeen ñépp, waxaatleen, ma dégg,
boroom xel daal дума ko gis ci seen biir!

¹¹ Samay fan wéy na,
mébét yàqu,
yaakaar yàkki.

¹² Ñii guddi lañu def bëccëg,
naan leer sorewul, te lëndëm teew.

Ayóoba

¹³ Ndegam kërug njaniiw laa yaakaarati,
te biir lëndëm laa nara tëri,

¹⁴ ndegam maa naa paxum yàqute ma: «Yaay sama baay!»
naa saxu bàmmeel: «Yaay bóoy!» mbaa «Jigéen sama!»

¹⁵ Kon ana sama yaakaar?
Ana ku gisati sama yaakaar?

¹⁶ Xanaa day ànd ak man tàbbi bàmmeel,
nu bokk tëraayu pënd.

18

Bildàdd buurati na

¹ Bildàdd mu Suwa àddu, ne:

² Xanaa dungeen noppi mukk?
Àndleen ak xel, nu wax.

³ Ay mala ngeen nu teg daal,
def nu ay naataxóona?

⁴ Yaw nag yaa topp sa mer ba loru!
Ayóobaa, àddina day gental ngir yaw a?
Am aw doj ay toxal boppam ngir yaw?

⁵ Ku bon kay lag leeram di fey,
te taalam du jolli.

⁶ Xaymaam day lëndëm,
làmpam ba ko tiim ne kamaj.

⁷ Bu daa waaxu démb, di temp tey,
ay mébétam di ko mbas.

⁸ Moo dox ba tàbbi cib caax,
wëndeeloo biir mbaal,

⁹ tànk ba téqtaloog fiir,
ab racctal ne ko ràtt.

¹⁰ Buum ga koy lonk a nga suulu,
am yeer di ko xaarew ñall.

¹¹ Lu ragloo koy darey mbetteel,
ne ko dann.

¹² Mooy xiif ba doole réer ko,
musiba taxaw, xejjoo ko.

¹³ Jàngoro di ko ñacc,
woppi ndee di lekk cér ya.

¹⁴ Ku bon lees di ñoddee fa jàmmi xaymaam,
diri ko ba fa kanam buuru musiba yi,

¹⁵ manees naa dëkke xaymaam, moomatu ko,
tamarax lees fay suy.

¹⁶ Ku bon mooy garab gu dee kaw ak suuf,
reen wow, xob lax.

¹⁷ Turam tukkee kaw suuf,

Ayóoba

ba deesatu ko tuddem pénc.

¹⁸ Dees koy bëmëxeg leer, tàbbal lëndëm,
dàqe ko àddina.

¹⁹ Du doom, du askan wu muy waccey bokkam,
te kenn du deseey dalam.

²⁰ Waa sowu jommi cig mujam,
waa penku di rasu naa:

²¹ «Dalub kàccoor déy, lee di mujam,
ku faalewul Yàlla, nii la màkkaanam!»

19

Yàllaa may jot

¹ Ayóoba àddu ne:

² Dungeen ma noppee xañ jàmmi bakkan,
di ma sëf wax ju dul jeex?

³ Fukki yoon a ngii ngeen di ma saaga,
te rusuleen maa sonal.

⁴ Su ma moyoon dëgg sax,
maay bokk ak sama moy fanaan.

⁵ Defe ngeen ne yeena ma gën,
ba di ma sikke musiba mii ma dal?

⁶ Waaye xamleen ne Yàllaa ma tooñ,
ab caaxam a ma dar kepp.

⁷ May woote wall, wuyeesu ma,
ma ñaan ndimbal, àtteesu ma.

⁸ Manumaa jàll, Yàllaa fatt sama yoon,
lëndëmal samay jaaruwaay,

⁹ sàggi sama sag,
foq sama kaala,

¹⁰ tojat ma wetoo wet ba ma tàggoo,
déjjati sama yaakaar ni garab,

¹¹ jafalal mam sànjam,
boole ma ciy noonam,

¹² ay gàngooram dikkandoo,
yékkatiy jal, gawe ma,
dal fi wër sama xayma.

¹³ Samay bokk, mu soreleek man,
samay xame sax ñooru ma.

¹⁴ Jegeñaale ba ma,
xame fàtte ma,

¹⁵ sama gani démb def ma ni jaambur tey,
samay mbindaan it noonu,
ñu def ma ni doxandéem.

¹⁶ Su ma doon woo sama surga, ba di ko tinu sax,

Ayóoba

da may tanqamlu.

¹⁷ Sama xetu gémmin òò na sama jabar,
sama doomi ndey sax seexlu ma.

¹⁸ Gone yi sax a ngi may sewal,
su ma jógee di dem, ñu di ma baatal.

¹⁹ Sama wóllerey démb yépp a ma sib,
ma sopp leen, tey ñu dèddu ma.

²⁰ Der aki yax laa dese,
daanaka dee naa.

²¹ Yërmandee, yërmande, yeen samay xarit,
Yàllaa xàcci, fàdd ma!

²² Lu ngeen ma toɲale nii ni Yàlla?
Xanaa yàppuleen ma ba suur?

²³ Éy su samay kàddu ténku woon ci mbind!
Éy su ñu manoonaa xacc mbind ma cib téere,

²⁴ xacce ko xalimag weñ ak beteex
mu ñaase fàww ciw doj!

²⁵ Waaye man xam naa ne sama °jotkat a ngi dund,
te mooy mujje taxaw fi kaw suuf.

²⁶ Bu sama der bi lekkoo sax,
du tee ma dese suux wu ma xoole Yàlla,

²⁷ xoolal ko sama bopp,
te du doon sama gan.

Maaka namm lii ci sama xol!

²⁸ Yeena ngi naan: «Ana nun koy toɲale,
ba am lay wu ko tiiñal?»

²⁹ Ragal-leen saamar!

Seen xadar jii ñaawtéef la, saamar ay àtteem,
xamleen ne àtte am na.

20

Cofar nee ku musiba dab, yaa tooñ

¹ Cofar mu Naama àddu ne:

² Kon ma àddooti ndax jaaxle,
ba xol jallaaño.

³ Dégg naa kàddug yedde gi nga may saagaa,
waaye samam xel a ma déey sa tont.

⁴ Xanaa xamoo lii? La dale ca cosaan,
ba nit tegoo kaw suuf ba tey,

⁵ xamoo ne ku bon, ag sarxolleem àggul fenn,
te bannexu yéefar yàggul?

⁶ Bu màggoon ba tollook asamaan it,

Ayóoba

ba bopp ba àkki fa kawa kaw,
7 day mujj seey fàww niy jonkanam;
ña ko daa gis naa: «Ana mu?»
8 Kenn du ko gisati, day réer ni gént,
mbaa njeneeru guddi ju dàqu, wéy.
9 Bët bu ko gisoon du ko tóllanti,
dëkkuwaayam dootu ko séen,
10 ay doomam ay dàmp néew-ji-doole yi,
ba delloo seen alal.
11 Mooy ànd ak dooley ndawam,
tëri biir bàmmeel.
12 Lu bon la daa tàqamtikoo,
log ko, làq ca suufu làmmiñ wa,
13 di ko siiramtal te du ko wacc,
xanaa taf ko ca digg denqleñ ma.
14 Waaye la muy lekk ay soppiku ca biiram,
doon danjaru ñàngóor ca butit ya.
15 Moo dërëxoon alal, moo koy goqi,
ca biiram la ko Yàlla di yuree.
16 Ndeke tookey ñàngóor la muucu,
mu rey ko ni mat-matu saamaan.
17 Yàlla bumu niir wali dex
ak waltani lem ak soow.
18 Dina delloo lu mu amoon, du ko warax;
te alal ju mu jula woon, du ko jariño.
19 Moo dëggaate néew-ji-doole, dëddu ko;
aakimoo kër jaambur te tabaxu ko.
20 Biir ba du wéet,
lu mu xemmem, du rëcc.
21 Dara du rëcc ab kollam,
moo tax xéewalam du toog.
22 Fa mu regge lay jàqe,
mépp musiba këppu ci kawam.
23 Ba muy sol kollam
la ko Yàlla di yónnee tàngooru sànjam,
tawal ko ko lu fees déqam.
24 Mu daw ngànnayyu weñ,
fittu xàjar bëtt ko,
25 jam ko ba fëll,
cat la bëtt xol ba, di melax fa mu sare,
tiitaangey ndee ne ko taral.
26 Mboolem lëndëm a làqu di ko xaar,
te sawara wu loxo jafalul a koy xoyom,
lakkaale lu desoon ca xaymaam.
27 Asamaan ay weer ñaawtéefam,
suuf jóg, seedeel ko tuuma.

Ayóoba

²⁸ Koomum këram day tukki, ne mes,
keroog sànjum Yàlla ma.

²⁹ Lii moo di wàllu nit ku bon, fa Yàlla,
muy cér bu ko Yàlla dogalal.

21

Ayóoba weddi na àlluway xarit ya

¹ Ayóoba àddu ne:

² Dégluleen maa, dégluleen sama baat,
te mas-sawoo ma seenug teewlu.

³ Muñal-leen ma boog, ma wax, man,
balaa nit a reeti.

⁴ Sama tawat lii, da di maak nit a?
Gannaaw du nit, ana lu ma tee xàddi?

⁵ Geesuleen ma, waaru,
ba loxo ub gémmiñ.

⁶ Su ma ko xalaatee, damay tiit,
di kat-kati.

⁷ Lu tax ku bon di dund,
bay magal sax, di ànd ak doole?

⁸ Doomam day toog, mu fekke,
bay xool ay sètam,

⁹ këram nekke jàmm, mucc safaan,
te yetu Yàlla du ko dal.

¹⁰ Ku bon, yëkkam day tëb te du moy,
nagam di jur te du xàcc.

¹¹ Day gis ay xaleem di bajantu,
goneem yépp di tëbantu.

¹² Day xaacoondook um tëgg aki xalam,
di bége baatub toxoro,

¹³ Ku bon ay ñédd ay fanam ci biir teraanga,
doora jekki wàcci njaniiw.

¹⁴ Moona kee noon Yàlla: «Xiddi ma!
Xam saw yoon soxalu ma.

¹⁵ Ana kuy Aji Man ji sax ba ma di ko jaamu?
Su ma ko tinoo, ana lu mu may jariñ?»

¹⁶ Kii xanaa du teraangaam a ngi ciy loxoom?
Ndaxam taxul ma roy ko fenn!

¹⁷ Ku bon, ana fu ag xuyyam kamaje?
Fu ko musiba dikkale?

Fu Yàlla mere, ba sédd ko safaan?

¹⁸ Ana fu ku bon mele nim ñax mu ngelaw wal,
mbaa boob mu callweer yóbbu?

Ayóoba

¹⁹ Áa ku bon daal ay tooñ, Yàlla dencal doomam añ ba?

Ki tooñ kay, na ko fey, mu xam,

²⁰ gisal boppam sànkuteem,

ba jolu merum Aji Man ji!

²¹ Ana luy yoonu ku bon ci waa këram, gannaawam,
te fekk limu fanam jeex?

²² Ana kuy jàngal Yàlla xam-xam,

moom miy àtte ñu kawé ña?

²³ Kii a ngi deeyaale dooleem,

xel ma dal, tiitul dara,

²⁴ yaram wa niin,

yax ya naat.

²⁵ Kee deeye naqaru xol,

masula ñam bàmneex,

²⁶ te ñooy tédndoo biir suuf,

bokk sàngooy sax.

²⁷ Mu ngoog! Maaka xam li ngeen foog,

te di ma ko fexee fitnaale!

²⁸ Ngeen ne: «Ana fu kër kàngam di mujje?

Ana xayma ba ku bon ka dëkke?»

²⁹ Xanaa laajuloo tukkikat yi?

Am gëmuloos seeni seede?

³⁰ Bésub safaan ku bon ay mucc,

bésub mbugal it, mooy raw.

³¹ Ana kuy janook moom, sikke ko jikkoom?

La mu def, ana ku ko koy fey?

³² Moom de bu deeyee, sëg ya lees koy robi,

te bàmmeelam, dees na ko wattu.

³³ Liy topp néew ba, day bare,

liy dox jiitu ko wees ab lim,

te suufu xur wa sax da koy sedde.

³⁴ Kon seeni mas-sawu, cóolóoli neen!

Seenii tont, jinigali kese!

22

Elifas nee tuub a war Ayóoba

¹ Ba loolu amee Elifas ma cosaanoo Teman àddu ne:

² Yàlla, ana lu ko nit mana jariñ?

Xanaa ku xelu jariñ boppam!

³ Ana lu sag njub mana yokk Aji Man ji?

Lu ko sag mucc ayib mana indil?

⁴ Xanaa du sag njullite la lay bantale,

bay àgg ak yaw ci layoo?

⁵ Du sag mbon gu réy a la ko yóbbe,

Ayóoba

ak say tooñ yu amul kem?

⁶ Yaa lebal mbokk, aakimoo tayleem ci dara,
bay nangu mbubbam néew-ji-doole, mu ne dunṅ.

⁷ Yaa mayul ku mar ndox mu naan,
mbaa nga xañ ku xiif lu mu lekk.

⁸ Boroom doole jagoo réew mi,
ku ñu beral loxo dëkke.

⁹ Yaa bàyyi jëtun, mu deme loxoy neen,
tey néewal doole ab jirim.

¹⁰ Moo tax ay ndëgg-sërëx di la dar kepp,
musiba jekki ne la taral,

¹¹ mbaa lëndëm gu la teree gis,
mbàmbulaan dikk, mëdd la.

¹² Xanaa Yàlla sutul asamaan?
Xoolal biddiww ya gëna kawe!

¹³ Nga naa: «Ana lu Yàlla xam?
Ana nu muy àttee ci gii lëndëm gu tar?»

¹⁴ Niir yee ko làq ba du nu gis,
fa muy doxantoo ca kaw taaxum asamaan!»

¹⁵ Dangaa nara topp ñallu démb,
wa nit ñu bon ña ñaloon?

¹⁶ Ñoo buube, ne mes te seen àpp jotul,
seen kenu màbb, wéy nim wal,

¹⁷ te ñoo doon naa Yàlla: «Xiddi nu!»
Ñii ana lu leen Aji Man ji di def?

¹⁸ Moona moo feesaloon seeni kër ay teraanga,
waaye ñu bon ñii, royuma leen fenn.

¹⁹ Aji jub ñeey gis sànkutey ñii, bég;
ñu mucc tuuma ñaa leen di kókkali,

²⁰ naan: «Ña nu jógaloon sàнкуwuñoom?
Seen koom ma xoyomuwwul a?»

²¹ Jubool ak Yàlla rekk, am jàmm,
ngëneel dikkal la.

²² Nangool ndigal ci làmmiñam,
te dëxëñi kàddoom ci sa biir xol.

²³ Dellul ci Aji Man ji rekk, ba taxawaat,
te nga sorele sa xayma njubadi.

²⁴ Tegal wurus ci suuf,
wacce wurusu ngalam doji xur,

²⁵ te Aji Man ji di sa wurus,
di sa jali xalis.

²⁶ Su boobaa nga bége Aji Man ji,
mana siggi, séentu Yàlla,

²⁷ di ko ñaan, mu di la nangul,
yaw it ngay wàccook say dige,

Ayóoba

²⁸ loo dogu, mu sotti,
foo jaare, mu leer,
²⁹ ba bu nit detteeloo, nga yékkati ko,
te ku toroxlu, Yàlla wallu la.
³⁰ Ku ñàkkula tooñ sax, mu xettli la,
te sag ñàkk sikk lees koy xettlee.

23

Ayóoba nee Yàlla noppi na

¹ Ba loolu amee Ayóoba àddu, ne:
² Ba tey maa ngi jooy jooy yu metti,
di onk bay ub gémmiñ,
³ Éy bu ma xamoon fa may gise Yàlla,
ba àkki péncam,
⁴ diis ko sama mbir,
àgge ko lépp lu may tawat,
⁵ ba xam lu di tontam,
dégg li mu may wax.
⁶ Ndax dooleem ju bare la may yeye?
Déedéet xanaa! Dina ma teewlu moos,
⁷ ba ku jub layoo faak moom,
ma daldi mucc sama àttekat fàww.
⁸ Seet naa wetu penku, Yàlla nekku fa,
ma seet sowu, gisuma ko.
⁹ Bu jàppee fa wetu bëj-gàннаar, gisuma ko fa,
bu jàllee bëj-saalum séenuma ko fa.
¹⁰ Ndaxam moo xam fi ma jaare,
te bu ma nattoo, ma génn ci
ni wurus wu ñu xelli.
¹¹ Tànkam, sama tànk,
yoonam laa tegu, moyuma ko.
¹² Dëdduwma ay santaaneem,
sama biir xol laa denc ay kàddoom.
¹³ Yàlla de kenn la, ana ku koy waññi?
Coobarey bakkanam lay def.
¹⁴ Mooy sottal lu mu ma dogalal,
te bare na lu mu ma nasal.
¹⁵ Lee tax su ma janook moom, tiit,
te lu ma gëna xalaat, gën koo ragal.
¹⁶ Yàlla daal a réccal samaw fit,
Aji Man jee ma tiital!
¹⁷ Du lëndëm gi ma nekke moo ma wedamal,
du lëndëm gii ma muur.

Ayóoba nee Yàllaa ngi tanqamlu

¹ Lu tee Aji Man ji àppal nit bési mbugal,
ba ku ràññee Aji Sax ji fekke yooyu bésam?

² Nit a ngi toxal kemu suuf,
nit a ngi sàcc ug jur, foral leen.

³ Mbaamu jirim, ñu wommat, yóbbu;
nagu jëtun, ñu jël kob tayle.

⁴ Néew-ji-doole, ñu buuxe ko ciw yoon,
baadoolo yi far bokk làquji.

⁵ Néew-ji-doole yaa ngii mel niy mbaami àll ci màndiŋ mi,
di fortaatu lu ñu lekk,
àll bu wow bi yor seen xontu njaboot.

⁶ Tooli jaambur lañuy góobaani,
di wittaani reseñ ca tóokëri ñu bon ña.

⁷ Duŋŋ lañuy fanaane ndax rafle,
sàngoo seen der ci sedd bi.

⁸ Ñooy tawtee tund ya,
di làqoo xunti yu ñu seeloo.

⁹ Xonceeds na jirim ci weenu ndeyam,
jëlees na tayle alalu néew-ji-doole.

¹⁰ Duŋŋ lañuy wéye ndax rafle,
biir wéet, ñuy gàdduy sabaar,

¹¹ di nal diwu oliw ci tooli jaambur,
di dër reseñ ju ñu dul naan.

¹² Biir dëkk ba la nit ñay binnee,
ña ñu gaañ di woote wall,
te Yàlla toppul kenn tooñ.

¹³ Ñee noonooŋ leer,
faalewñu yoonu bëccëg
te duñu fa taxawaaloo.

¹⁴ Bët di set, bóomkat jóg,
bóom baadoolo bi néew doole,
guddi jot mu dib sàcc.

¹⁵ Moykat bu góor a ngi yeeru timis,
fab ndimo, kaalawoo,
naan bët du ko gis.

¹⁶ Ñu ngi lëndëmtu, di toj kër yi,
bëccëg ñu tëju,
xamuñug leer.

¹⁷ Ñoom ñépp ñuulaayu guddeey seen bëccëg,
lëndëm gu ne këruus lañu xejjool.

Ayóoba

¹⁸ Yal nañu wéye walum ndox,
te suuf sa ñu séddoo alku,
ba kenn dootu dëgmal tóokëru reseñ.

¹⁹ Yal na maral ak tangoor ñiisal seen ndoxum taw,
te njaniiw mëdd ña bàkkaar.

²⁰ Yal na leen seen ndey sax fàtte,
sax yi muucu leen,
ñu fàtte leen,
ba njubadi déjjetiku ni garab.

²¹ Ñu ni mel ay lekk alalu jigéen ju tëlee jur,
te duñu baaxe jëtun.

²² Waaye Yàllaa mana dàq boroom doole,
su nee tëll, mu xalaat bakkanam.

²³ Moo leen di may ñu wéeroo seen cëslaay,
tey xool fa ñuy jaare.

²⁴ Dañuy jóg, nes tuut ñu ne mes,
wadd, ñu boole for,
ñu daldi lax niy gub.

²⁵ Su dul noonu, ana ku may fenloo?
Ana ku mana neenal samay wax?

25

Deesul am dëgg fa Yàlla

¹ Bildàdd ma bàyyikoo Suwa àddu, ne:

² Yàllaa man te mata ragal,
di def jàmm fa kawteem ya.

³ Ay gàngooram limu naam?
Ana ku mu dul jam ceeñeeram?

⁴ Ana nu nit di ame dëgg fa kanam Yàlla?
Ku jigéen jur, nu mu mana laabe?

⁵ Xoolal, weer wi sax leerul ba dooy ko,
te biddiww yeet gisul seen sellaaay leer,

⁶ astamaak nit kii tanewulu sax,
doom aadama jii gënul gasax.

26

Yaa mat wall

¹ Ayóoba àddu, ne:

² Ndaw ndimbal lu réy ci ku néew doole!
Yaaka mana wallu ku amul kàttan!

³ Yaaka mana xelal ku xeluwul
ak xam-xam bu yaa bi nga fi xamle!

Ayóoba

⁴ Ana ci koo jële sa kàddu yii sax?
Ak ku la xelal miim xel?

Yàlla kenn xamu ko.

⁵ Ndem-si-yàlla yaa ngay lox
ca ron ndoxi biir suuf, ñook ña fa dëkke.
⁶ Fàññ la njaniw def fa kanam Yàlla;
du genn kiiraay gu ko làq paxum sànkute.
⁷ Kee firi asamaan fu dara amul,
sanjamtal suuf fu dara newul.
⁸ Kee gëndaley ndox ciy xàmbaraam,
te taxul niir wa ñu laloo fàcc.
⁹ Keey firi aw niiram,
yiire ngànguneem.
¹⁰ Kee rëdd digu wërngal fi kaw géej yi,
fa cat la leer ak lëndëm digaloo,
¹¹ kenuy asamaan jaayu,
di jommi ci kàddu yi muy gëddee.
¹² Dooleem la mane géej,
manooreem la rajaxee Raxab ninki-nànka ja.
¹³ Noowam wal, asamaan leer,
loxoam jam jaan jay balaw-balawi.
¹⁴ Lii de, mooy lenni jalooreem!
Ndaw ndéey lu tuut lu nu ci dégandeem!
Ana ku mana xam riiru dooleem?

27

Ayóoba bañ na

¹ Ayóoba dellu yékkati kàddoom, ne:
² Yàlla miy dund seere na, moom mi ma xañ dëgg,
moom Aji Man ji ma teg naqaru xol,
³ ne li feek may ànd ak bakkan,
di noyyee noowal Yàlla,
⁴ sama gémmin gii du wax njubadi,
sama làmmiin wii laa ne, du tudd ay fen.
⁵ Yàlla buma leen jox dëgg,
ba ba may dee дума weddi samag mucc sikk.
⁶ Sama njekk laay ñoy, дума ko ba,
sama giiru dund sama xel du ma yedd.

Yéene néeg la

⁷ Yal na noon bokk ak ku bon demin,
ku may fexeel bokk ak kàccoor ag muj.
⁸ Ana lu yéefar biy yaakaarati bu fàddoo,

Ayóoba

ba Yàlla moom bakkanam?

⁹ Bu ko njàqare di dikkal,
Yàlla day dégg yuuxam a?

¹⁰ Ndax Aji Man ji la daan bége,
am daan na tudd Yàlla fu mu tollu?

¹¹ Ma xamal leen boog li ci dooley Yàlla,
duma leen nëbb li Aji Man ji namm.

¹² Dama ne, yeen ñépp a ko gisal seen bopp sax,
kon lu leen yebuloo nii ci neenug neen?

¹³ Lii mooy cér bi Yàlla sédd ku bon,
mooy wàll wi Aji Man ji dencal ku néeg.

¹⁴ Njabootam ne xas, saamar jagoo,
te balaa booba duñu lekk ba suur.

¹⁵ Ña koy wuutu, mbas a leen di rey,
te ay jëtunam duñu ko jooy.

¹⁶ Su doon jal xalis ni suuf,
yére yomb ko ni feppi suuf,

¹⁷ mooy dajale, aji jub sol;
xaalis ba, kay def njub séddoo.

¹⁸ Mooy tabax kër gu tanewul
mbaarum wattukatu tool,
te lëndu jargoñ gën koo dëgër.

¹⁹ Keey tëraale alal ju mu dul gisati;
day xippi, fekk mu ne mes.

²⁰ Musibaa koy dab nim wal,
ngélénu guddi këf, yóbbu,

²¹ ngelawal penku déjjatee ko këram,
jalax, mu wéy.

²² Dees na ko diir, bañ koo ñéeb lu,
mu daw, di wuta rëcc dooley saan ya.

²³ Dees na ko tacc-taccali loxo,
di ko ciipoo fa këram.

28

Xel mu rafet, fa Yàlla

¹ Xaalis déy am na mbellam,
wurus am bérabu seggukaayam,
² weñ gu ñuul ci suuf lees ko jële,
te xàñar, ay doj lees di xelli, ba am ko.

³ Dees na taal, dàq ug lëndëm,
di gëstu ba fu gëna làqu
doji biir lëndëm gu ne këruus.

⁴ Nit a ngi gas ay xunti fu soreeki dëkkuwaay,

Ayóoba

di sandaamtalook a jaayu fu kenn newul,
te tànk jaarewu fa.

⁵ Kaw suuf day meññ ub dund,
xóote ya mel ni lu sawara salfaañe.

⁶ Doj ya ca biir la peri safiir màkkaanoo,
te pëndaxu wurus ñàkku fa.

⁷ Wii yoon, tan xamu ko,
bētu jaxaay du ko gis.

⁸ Rabu àll du fa joggi,
te gaynde sax du fa jaare.

⁹ Loxol nit ay song doju kekk,
buddi reeni tund, jàllarbi.

¹⁰ Ci biir xeer yi lay yettey xunti,
ba bêtam di gis lu cay alal.

¹¹ Nit a ngi dogale wali ndox,
ba lu làqu woon, mu leeral nàññ.

¹² Waaye xel mu rafet fees koy jële,
ak fu ag dégg màkkaanoo?

¹³ Doom aadama xamul njégam,
te amul biir réewum aji dund ñi.

¹⁴ Xóote ya nee: «Xel mu rafet dèkku fi de!»
Géej ne: «Nekku fi de!»

¹⁵ Wurus mayewu ko,
xaalis wecciwul njégam.

¹⁶ Deesu ko weccee wurusu ngalam it,
mbaa peri onigsë ak safiir.

¹⁷ Deesu ko méngaleek wurus
ak ngën-gi-per yuy tàkk,
te ngën-gi-gànjari wurus wecciwu ko,

¹⁸ waxeesuli xor ak yeneen xeeti per;
xel mu rafet a gën per yu gëna jafe,

¹⁹ du moroomu peru topaas
ba ca réewum °*Kuus,
te wurusu ngalam daal wecciwu ko.

²⁰ Xel mu rafet, ana fu mu jóge,
ak fu ag dégg màkkaanoo?

²¹ Ump na bētu lépp luy dund;
njanaaw la fa kaw sax gisu ko.

²² Paxum sànkutee ngi àddoondook ndee naan:
«Dégmati nan ub jëwam de!»

²³ Yàllaa ràññee yoon wa jëm xel mu rafet,
te moo xam màkkaanam.

²⁴ Kii daal ay jéer ba fa cati àddina,
di gis mboolem lu asamaan tiim.

Ayóoba

²⁵ Ba Yàlla àppalee ngelaw diisaayam,
nattal ndox ab dayoom,
²⁶ ba mu sàkkalee ab taw dogalu yoonam,
sàkkal melax ak dënu aw ñallam,
²⁷ ca la nemmiku xel mu rafet, xamle ko,
samp ko, gëstu ko,
²⁸ daldi ne doom aadama:
«Ragal Boroom bi daal, mooy xel mu rafet,
te dëddu lu bon mooy am ug dégg.»

29

Ayóoba jooy na démbam

¹ Ayóoba tàmbaleeti ne:
² Éy ku ma doon delloo jamono ya woon,
fan ya ma Yàlla daa wattoo;
³ ba mu may tiim, di ma niital,
may doxe ag leeram, biir lëndëm!
⁴ Ba ma tolloo sama digg doole,
te Yàlla xejjoo sama xayma.
⁵ Booba Aji Man jaa ngeek man ba tey,
sama gone yu góor yéew ma,
⁶ may jàngoom niw,
seggukaay di ma walal ag diw.
⁷ Bu ma génnaa ba ca bunt dëkk ba,
digg pénc ma laay jekkasndikoo,
⁸ waxambaane gis ma, ñooru,
mag ña jóg, taxawal ma,
⁹ kàngam ne xerem,
ub gémmiñam,
¹⁰ garmi ne selaw,
lámmiñam taqoo denqleñam,
¹¹ nopp dégg ma, ndokkeel ma,
bët gis ma, seereel ma yiw.
¹² Néew-ji-doole woote, ma wallu,
boole ci jirim bu tumurànke.
¹³ Ñaanu ku naroonna sàнку di ma dal,
may tooyal xolu jëtun.
¹⁴ Njekk laa woddoo woon, njekk wodd ma,
te dégg laa defoon mbubb ak kaala.
¹⁵ Silmaxa, maa dooni gëtam;
ab lafañ, ma diy tànkam.
¹⁶ Néew-ji-doole, maa doon baayam,
ku ma xamul sax, may seet àqam.
¹⁷ Ku jubadi, ma dammi ñaamam,
foqatee am pàddam cay sellam.

Ayóoba

¹⁸ Ma noon samay fan dina neexook feppi suuf,
ma doora deeye sama biir njaboot.

¹⁹ Ma noon su ma doon garab samay reen fëllem ndox,
ab lay fanaanee faam car ya.

²⁰ Ma noon darajaa may yeesalal nganam,
may gëna daŋalati xala.

²¹ Man lees daa déglu, di ma xaar;
ne cell, di taataan samam xel.

²² Samay kàddoo leen di dal, genn-genn,
te su ma àddoo ba daaneel, kàddu jeex.

²³ Booba lees ma daa séentu nib taw;
ŋa ŋàpp, di nég waamey waxset.

²⁴ Samay ree gëmeesu ko woon,
xanaa ne siiwa gis sama kanam gu leer.

²⁵ Maa jiite woon, di dogal doxalin,
toog toogaayu buur ci biir gàngooram,
te di leen dëfal ci seen naqar.

30

Ayóoba jooy na coono

¹ Tey ñi may diijoo ngii, te ñoo ma féete ndaw,
seeni baay a tekkiwuloon tus,
ba ma siide leena jël,
ñuy sàmmandook samay xaj.

² Ana njariñ lu ñu ma amaloon sax?
Yooyu kooñoor yu jeele?

³ Ñii ndóol, xiif, deseŋ yax,
di ñeeñaatoo biir àll,
fu lëndëm, gental, maral,

⁴ di witt ñax mu saxe ciy tan
ak a gasi reen, di dunde.

⁵ Ñooñu lees dàqe fi biir nit ñi,
di leen yuuxoo niy sàcc,

⁶ ñu dëkkey xur,
ci biiri pax aki doj,

⁷ di ñaaxe biir gajj gi,
dankaloo ci ron déŋ yi.

⁸ Ñu sew lañu, ñu kenn yégul,
xanaa caw leen, génne réew mi.

⁹ Tey nag ñoo may woyantoo,
di ma lééboo.

¹⁰ Dañu maa seexlu, ñooru ma,

Ayóoba

néeg maa serati ci kanam.

¹¹ Yàllaa ma nasaxal, torxal ma,
ba amatuñook man yemukaay.

¹² Mii njurum baadoola mu féete ndijoor, di ma téqtal,
di ma xàllal yooni sànkute.

¹³ Ñu ngi may dogale, nar maa musibaal,
te soxlawuñu ci ndimbal.

¹⁴ Fu yaa lañu bëtte,
buure jali tojit, ne jàyy fi sama kaw.

¹⁵ Musiba da maa ëlëm,
sama daraja naaw ni ngelaw,
sama teraanga naaxsaay niw niir.

¹⁶ Tey maa ngii sama bakkan di ñiis,
bési njàqare ne ma taral.

¹⁷ Guddi dikk di bënn samay yax, muy rot,
mitit di ñereñ te du selaw.

¹⁸ Kii ne nikk sama mbubb,
ne ratt sama baatu mbubb,

¹⁹ xalab ma ci biir ban bi,
may nirook pënd akub dóom.

²⁰ Woo naa la wall, wuyuwu ma,
ma taxaw, nga niir ma.

²¹ Yaa soppiku, néege ma,
di ma soxoree sa diisaayu loxo.

²² Yaa ma ne siféet, waral ma ngelaw,
panti-pamtee ma biir ngélén.

²³ Xam naa xéll ne ci dee nga ma jëme,
te mooy kërug ndajem képp kuy dund.

²⁴ Ku sànkule du tàllal loxoo?

Ku musiba dab du woote wall?

²⁵ Moona sama rongooñ a daan tuurul boroom tiis,
sama xol di tiisoo aji ñàkk ji.

²⁶ Lu baax laa yaakaar, lu bon ne jalañ,
leer laa séentu, guddi ne jaas,

²⁷ sama xol lëmbaajoo, tée dal,
bési naqar dogale ma.

²⁸ Maa ngi wéye ñuulaay bu ma tàngoor tegul,
di taxawe biir ndaje, di woote wall.

²⁹ Damaa mujj bokk ak till,
neexook looy,

³⁰ ñuul, yaram di xub,
tàng, di bax,

³¹ sama xalam tiisal,
sama toxoro jooy.

Ayóoba waat na

¹ Maa jaayanteek samay gët.

Ana nu may xooleb janq?

² Lu ko moy ana sama cér ca Yàlla ma fa kaw?

Lu ma Aji Man jiy sédde fa kawte ya?

³ Xanaa du safaan a ñeel ku bon,
naqar ñeel ku ñaaw?

⁴ Du Yàllaa ngi gis fu ma jaare,
di waññ sama bépp jéego?

⁵ Ndegam damaa doxe ndëngte,
mbaa ma gaawtoo njoblan,

⁶ na ma Yàlla natte màndaxekaayu dëgg,
ba ràññee samag mat!

⁷ Ndegam samay tànk a moy yoonu njob,
mbaa sama xol topp saay gët,
mbaa sama yoxo yii gàkk fenn,

⁸ yal naa ji, keneen lekk,
ma jëmbat, ñu buddi.

⁹ Ndegam jabaru jaambur a ma xañ sago,
ba ma di ko yeeroo sama buntu kër moroomu góor,

¹⁰ yal na sama jabar bojjal keneen,
ñeneen tiim ko.

¹¹ Su ma ko defoon, muy jëfu yàqute,
di moy gu yeyoo pénc,

¹² te di sawara wu may xoyom
ba ca paxum sànkute ma,
lu ma meññle, mu buubaale.

¹³ Ndegam maa sofental sama àqu jaam,
bu ñu may jooytu, diy góor mbaa jigéen,

¹⁴ bu ci Yàlla jógee, ana nu may def?

Bu ma ko laajee, ana lu ma koy wax?

¹⁵ Ki ma sàkk ci sama biiru ndey,
xanaa du moo leen sàkk ñoom itam?

Du kenn kee nu sos ci njurukaay?

¹⁶ Damaa masa xañ néew-ji-doole lu muy sàkku,
mbaa ab jëtun wékk ma bët, ma tas yaakaaram?

¹⁷ Am damaa masa wéetoo ab dog,
te sédduma ca jirim?

¹⁸ Ba may ndaw laa dala yor ab jirim ni baayam;
te ba ma juddoo ci sama ndey laa dala gindi ab jëtun.

Ayóoba

¹⁹ Ndegam maa seetaan ku rafle nara sàнку,
seetaan néew-ji-doole ju amul malaan,
²⁰ te sànguma céram, mu sante ma ko,
di nugloo ndimo lu ñu ràbbe sama kawari gàtt,
²¹ ndegam maa xàccil sama loxo ab jirim,
ndax yaakaar kiirlaay ca pénc ma,
²² yal na sama loxo teqlikook sama mbagg,
sama pèrèg fàqe ci conc li.
²³ Mbugalu Yàlla kat laa ciy ragal,
te màggaayam xajul ci man.

²⁴ Ndegam damaa def wurus sama yaakaar,
bay tudde ngën-gi-wurus sama cēslaay;
²⁵ ndegam maa bége sama alal ju bare,
bége koom gu ma sama doole may;
²⁶ ndegam maa masa niir jant beek leeraayam,
mbaa weer wiy daagoo yànjaayam,
²⁷ ba namma làqu, di ci jaamu lenn,
bay foon sama loxo, wormaale leen;
²⁸ konoon it muy ñaawtéef gu yeyoo àtte,
nde kon ma weddi Yàlla ma fa kaw.

²⁹ Ndegam maa bége musibay bañ,
mbaa ma bellaxndikoo loraange ju ko dab,
³⁰ te bàkkaarewuma sama làmmiñ sax,
ba di ci ñaanal noon alkànde,
³¹ ndegam du samay bokk a ma seedeel ne:
«Ana ku mu leelul ndawal ba mu regg?»
³² te biti, masumaa wacc doxandéem di fa fanaan,
sama bunt laay ubbil ku nekk ciw yoon,
³³ ndegam maa roy nit ñi, di nèbb samay tooñ,
di nèpp-nèppal sama sikkaange,
³⁴ ragaluma jèwu àddina de,
tiituma mbooloo mu ma nawloodi it,
ba ne cell baña génn sama buntu kër.
³⁵ Ma ne éy ku may may nopp?
Sama torloo ngoog, na ma Aji Man ji tontu!
Su dee téereb tuuma bu ma ku may layool bindal,
³⁶ maa koy gàddu, kaalawoo.
³⁷ Maay limal Yàlla jéego bu ma séqi,
di taxawi fa kanamam taxawaayu garmi.

³⁸ Ndegam sama tool a ma tuumaale ay jooy,
rongooñi toobo yay bas-baseendoo,
³⁹ ndegam maa lekk lu ca ñor, te dikkewuma dara,
ba xañ bakkan ña ma ko beyaloon,
⁴⁰ kon yal na ay dég wuutu bele ba,

ñax mu bon wuutu lors ba.

Fii la kàdduy Ayóoba yem.

32

Ndaw nee na mooy tontu mag

¹ Fa la ñetti góor ñooña noppee tontu Ayóoba, ndax la Ayóoba gis njekkam. ² Ba loolu amee Eliyu doomu Barakel ma askanoo ci Buus, bokk ci làngu Ram daa mer ba futt ca la Ayóoba dëggal boppam fi kanam Yàlla, ³ ak la ñetti xariti Ayóoba ya ñàkk lu ñu ko tontu, ba tax ñu teg Yàlla tooñ. ⁴ Eliyu nag moo mujjoona wax ak Ayóoba, ndax moo féete ndaw ñett ña. ⁵ Mu gis ne ñetti góor ña amatuñu tont, xol ba sot, mu mer ba futt. ⁶ Ca la Eliyu doomu Barakel waa Buus ba, àddu ne:

Man de damay ndaw, ngeen diy mag,
ba tax may teeylu,
ragal leena biralal sama xam-xam.

⁷ Ma noon: «Na yàgga-dund wax,
na dund-jopp xamle xel mu rafet.»

⁸ Ndeke xel mi ci nit
mooy noowal Aji Man ji koy may dég-dég.

⁹ Dund-jopp taxula rafet xel,
te di mag taxula xam yoon.

¹⁰ Moo tax ma ne: «Déglu ma;
man it ma biral sama xam-xam.»

¹¹ Dama ne, négandiku naa seeni kàddu,
teewlu seeni déggin,
ba ngeen di jeexi tont ba tey.

¹² Yeen laa doon teewlu,
te kat kenn ci yeen yeyu ci Baay Ayóoba,
kenn joxu ko tontam.

¹³ Buleen ma ne:

«Xel mu rafet mi nu ci gis moo di:
Yàllaa ko mana tiiñal waaye du nit.»

¹⁴ Du man la Baay Ayóoba jëme kàddoom,
kon du seeni wax laa koy tontoo.

¹⁵ Ñii kat jommi nañu, waxatuñu;
ba kàddu dëddu leen!

¹⁶ Dama leen di xaar te waxuñu,
xanaa taxaw, tontootuñu?

¹⁷ Damay tontu sama wàll, man it;
damay biral sama xam-xam, man it kay!

¹⁸ Sama dënn a fees aki wax,
te samam xel xiir ma ci wax.

Ayóoba

- ¹⁹ Sama xol baa ngii mel ni
lu sol biiñ, ube ràpp,
mbete mbuus mu yees mu nara fàcc.
²⁰ Naa wax boog, ba féex,
naa àddu, ba tontu.
²¹ Duma ci am xejj ak seen,
te duma jay kenn.
²² Xawma sax nu ñuy jaye,
nde konoon ki ma sàkk gaaw ma fee jële.

33

- ¹ Léegi Baay Ayóoba, ngalla déglul samay wax
te teewlu sama kàddu yépp.
² Xaaral, ma àddu boog,
ba sama làmmiñ tudd li may bégga wax.
³ Xel mu dëggu laay waxe,
samay kàddu di xam-xam bu wóor.
⁴ Ngelawal Yàllaa ma sos,
noowal Aji Man ji daal a ma may bakkan.
⁵ Soo manee, tontu ma;
defarul, janook man.
⁶ Maa ngii, yem ak yaw fa Yàlla;
ci ban lañu ma mooñe man itam.
⁷ Du sama ñàngaay bu lay tiital,
du sama daraja ju la diis.

Yàlla du moroom

- ⁸ Yaa wax déy, ma dégg,
te dégg naa bu baax say kàddu.
⁹ Nga ne: «°Set laa def, tooñuma;
mucc ayib laa def, ñaawuma fenn.
¹⁰ Waaye Yàllaa ngii di ma wuta taqal,
def ma ab noonam,
¹¹ jéng ma,
di xool fépp fu ma jaare.»
¹² Foofu déy, moy nga dëgg, ma wax la ko,
Yàllaa sut doom aadama.
¹³ Ana loo koy sikke,
naan du layoo lenn ci mboolemi jëfam?

Yàlla dina wax ciy gént

- ¹⁴ Yàlla déy, dees koo teewluwul,
waaye day wax benn yoon ba jaar
¹⁵ ci biir peeñum géntu guddi,
fa nelaw dabe nit,
ba mu yàndoore kaw lalam.

Ayóoba

¹⁶ Mu ne ko rukk ndéey,
boole kook màndarga, artoo ko ko,
¹⁷ ngir dëdduloo doom aadama ji ay jëfam,
musal jàmbaar cig réy,
¹⁸ sorale bakkanam pax,
ba ab xeej du ko bóom^b.

Eliyu nee mitit ndéey la

¹⁹ Nit dina mbugaloo mitit wu ko tëral,
muy kat-kati rekk.
²⁰ Day bañ dugub,
seexlu ñam wu ko gënoona neex,
²¹ jeex tàkk bay réer ak a feeñ,
yaxam ya ne fàññ te sàngu woon,
²² dundam dëgmal ndee,
bakkanam di jegeji pax.

Eliyu nee njotlaay du ñàkk

²³ Waaye su nit ki amee malaakam àttekat,
nay kenn sax ci junniy malaaka,
ngir xamal nit ki li ko war,
²⁴ da koy baaxe, daldi ne Yàlla:
«Musal ko ba du wàccagum biir pax.
Maa ngeek njotlaayam.»
²⁵ Yaram wa jootaat tooyaayu ndaw,
mu amaam dooley ngoneem;
²⁶ bu ñaane Yàlla, mu nangul ko,
geesu ko, mu sarxolle,
nde Yàllaay fey nit njekkam,
²⁷ nit ki seedeeli ko ca nit ña, ne:
«Maa bàkkaar, maa xëtt njub,
te feyeesu ma ko sax!
²⁸ Yàllaa ma jot ba jàlluma, jëm pax,
xanaa dellu di gis ug leer.»

²⁹ Lii lépp déy, la Yàlla di def,
mook nit ñaari yoon ba ñett,
³⁰ ngir sorale bakkanam pax,
bàyyee ko leeraangey àddina.
³¹ Baay Ayóoba, teewlul, déglu ma,
neel cell, ma wax la, man.
³² Soo amee lenn loo wax, àddul;
waxal, ngir bëgg naa laa dëggal.
³³ Lu ko moy nag, yaa may déglu,
ne cell, ma jàngal la xam-xam.

^b**33.18** Manees na koo jàngé nii itam: ba du jàllagum dexu ndee.

34

Eliyu nee Ayóoba moy na dëgg

¹ Eliyu dellu ne:

² Yeen ñi xelu, dégluleen samay wax,
yeen ñi xam, teewluleen ma.

³ Purux déy ay mosu ñam,
nopp natt kàddu.

⁴ Kon nan ànd seet li dëggu
te bokk ràññee li baax.

⁵ Baay Ayóoba kat nee moo yey,
Yàlla xañ ko dëggam.

⁶ Mu am dëgg, ñu ne moo fen,
tooñul, mu jam ko fittu ndee.

⁷ Ana ku mel ni Baay Ayóoba mii,
di ñaawle ni muy naanem ndox,

⁸ di àndandook ñiy def lu ñaaw,
di lëngook nit ñu bon ñi,

⁹ te naa: «Nit ki seet bannexu Yàlla,
ana lu mu koy jariñ?»

Yàlla du def lu bon

¹⁰ Kon yeen niti xel ñee, dégluleen ma,
Yàlla jegewul fenn mbon!

Aji Man ji jegewul muk njubadi!

¹¹ Jëfu doom aadama ji daal, moom la koy fey;
na nit kiy jëfe rekk la koy yoole.

¹² Li wóor mooy Yàlla du def lu bon,
Aji Man ji du jalgati yoon.

¹³ Ana ku ko dénk kilifteefu dun bi?
Ana ku ko yen àddina wërngal këpp?

¹⁴ Bu ci Yàlla yebu woon,
ba roccim xelam ak noowam,

¹⁵ bépp boroom bakkan ay bokk ne lasiim,
doom aadama dellu di pëndub suuf.

Yàlla amul par-parloo

¹⁶ Ndegam am ngag dëgg, déggal lii,
teewlul sama kàddu gii.

¹⁷ Manees naa jiite te bañ yoon?
Am dangay sikkal ki njubam matale?

¹⁸ Kii moo naan buur: «Yaa sew!»
naa garmi: «Yaa bon!»

¹⁹ Kii du far kàngam,
du teg ku am ci kaw ku ñàkk,
nde ñoom ñaar la boole sàkk.

Ayóoba

- ²⁰ Nes tuut, dee dikke xaaju guddi,
mbooloo fippu, kàngam ya ne mes,
boroom doole sàнку, te loxo laalu ko.
- ²¹ Yàlla déy a ngi ne jàkk ci jaar-jaari nit ki,
di xool bépp jéegoom.
- ²² Du fenn fu lëndëm mbaa fu ne këruus,
fu kuy def lu ñaaw mana làqoo.
- ²³ Yàlla daal, soxlawula liñbat nit ki,
bala mu koy woo cib àtte.
- ²⁴ Mooy rajaxe boroom doole te du laajte,
daldi fal keneen mu wuutu ko.
- ²⁵ Moo ràññee moos jëfi boroom doole,
ba jàllarbi ko genn guddi, mu rajaxoo.
- ²⁶ Moo koy dóore fu ne fàññ,
ni ñuy dóore ku bon.
- ²⁷ Li ko waral di boroom doolee dëddu Yàlla,
sofental mboolem digley yoonam,
- ²⁸ ba yuuxi baadoola yi àgg fa moom,
mu dégg yuuxi néew-ji-doole ya.
- ²⁹ Bu Yàlla nee cell, ana ku koy ñàññ?
Bu làqee kanamam, ana ku koy niir?
Xeet yeek nit ñi la boole tiim,
- ³⁰ ngir yéefar bi baña falu,
bay tàbbal aw xeet ciy fiir.

Eliyu nee kàdduy Ayóoba du xel

- ³¹ Su nit ki nee Yàlla:
«Jot naa samab añ, dootuma bàkkaar.
³² Won ma sama tooñ yi ma gisul.
Su ma defee lu ñaaw, dootuma ko def!»
- ³³ Kooku, Yàlla dina ko mbugal a?
Lu ciy sa xalaat, yaw miy diiñat,
gannaaw yaay seet te du maay seet?
Waxal boog, loo ci xam!
- ³⁴ Niti xel ñi dinañu wax,
ñook ku rafet xel ku may déglu,
³⁵ ne ma: «Ayóoba mii waxewul xam-xam,
te kàddoom yi du xel.»
- ³⁶ Kon na àtteb Baay Ayóoba mii mat sëkk,
nde tontam bokk na ci tontu nit ñu bon ñi.
- ³⁷ Moo bàkkaar, doyatul muy diiñat,
di werante ci sunu biir,
di kebetu ci kaw Yàlla.

35

¹ Eliyu dellu ne:

² Defe nga ne lii yoon la?

Nga ne: «Maa am dëgg fi kanam Yàlla,»

³ te naan ko: «Ana lu ma ci soxal man,
ak lu ma ñàkka bàkkaar di jariñ?»

⁴ Man mii nag maa lay tontu,
yaak say xarit.

⁵ Séentul asamaan te xool,
niiral niir yii la tiim!

⁶ Soo bàkkaaree, lu muy wàññi Yàlla?
Man ngaa tooñ, tooñati ba def ko dara?

⁷ Ana njekk goo def ba may ko lenn,
ak lu muy jële sax ci say loxo?

⁸ Sag mbon, sa moroomu nit lay lor,
sag njekk it doom aadama ni yaw lay jariñ.

⁹ Noteel law na ba nit ñiy yuuxu,
di woote ku leen wallu ci loxol boroom doole.

¹⁰ Waaye kenn du ci ne: «Wóoy ana Yàlla mi ma sàkk,
kiy fentloo woyi cant ci biir guddi,

¹¹ di nu xamal lu rabu àll xamul?
di nu may xel mu njanaaw amul?»

¹² Bu nit ñu bon ñiy woote wall, du wuyu
ngir seenug réy.

¹³ Neen lañuy woote, nde Yàlla du leen déglu,
Aji Man ji du leen faale.

¹⁴ Kon ngalla yaw mi ne gisoo ko,
te ne diis nga ko sa mbir, di ko xaar.

¹⁵ Nga neeti Yàlla du mer, di mbugale,
te yoonam newul ci njubadiy nit.

¹⁶ Ayóoba mii de, cóolóolu neen lay wax,
mbel-mbel ju àndul ak xam-xam.

36

Eliyu nee coonoy àddina am njàng la

¹ Eliyu dellu ne:

² Négal tuuti, ma xamal la;
ay kàddoo ngeeti yu may waxal Yàlla.

³ Fu xóot laay jukkee sama xam-xam,
ba delloo dëgg ki ma sàkk.

⁴ Sikk déy, nekkul ci li ma lay wax;
ku buural xam-xam a janook yaw nii!

⁵ Dama ne, Yàllaa m àgg te du jalaxe,
moo m àgg te réy um xel.

Ayóoba

- ⁶ Du ba ku bon, mu dund,
te mooy jox néew-ji-doole àqam.
- ⁷ Du noppee xool aji jub ñi,
xanaa di leen dēj ci jali buur yi,
saxal seen toogaay, màggal leen.
- ⁸ Bu ñu demee ba ñu jéng leen,
mbaa buumi njàqare ñodaar leen,
- ⁹ Yàllaa leen koy artoo ci seeni jéf,
seen tooñi reewande.
- ¹⁰ Da leen di dégtal ndigal,
ne leen ñu dëddu ñaawtéef.
- ¹¹ Su ñu ko déglóo, déggal ko,
jeexale bés yu rafet,
mujje ati bânneex.
- ¹² Su ñu dégluwul, jàlli dexu ndee,
faatuu ndax xamadi.
- ¹³ Ab yéefar day denc mer,
te mbugal du tax mu woote wall.
- ¹⁴ Ku ni mel ay deeye ndaw,
ay fanam jeexe biir gacce.
- ¹⁵ Yàllaay wallu boroom tiis ciw tiisam,
di tege coono, ba ñu déglu ko.
- ¹⁶ Moom it moo lay xettli ci njàqare,
weccee la ko fu yaa fu la dara xatalul,
taajal la ñam wu duun te niin.
- ¹⁷ Waaye aña ku bon duunal na la,
dëgg ak yoon ne la taral.
- ¹⁸ Bu la kenn xiirtale alal,
te bu la ger bu réy jengloo.
- ¹⁹ Kon déy doo yuuxu ba mucc ci njàqare,
kër-këreek doole it du la ca génne.
- ²⁰ Bul yàkkamti guddi;
ca law xeet di jekki buuboo seenum réew.
- ²¹ Moytula walbatiku di def ñaawtéef,
moo tax nattu dikkal la.

Yàlla mooy buur

- ²² Yàlla, kay, mooy ki dooleem kaweel!
Ana ku mana jàngle ni moom?
- ²³ Ana ku ko masa rëddal yoonam?
Ak ku ko ne: «Def nga naka-su-dul-noonu?»
- ²⁴ Bul di fàttee màggal jéfam,
yi ko nit ñiy woye.
- ²⁵ Mboolem doom aadama gis na ko;
nitoo nit séene ko fu sore.
- ²⁶ Yàlla, kay daa màgg ba wees xam-xam,

te ay atam, deesul xayma lim ba.

²⁷ Keey ñoddi toqi ndox,

mu def ub lay, tawal,

²⁸ niir yi sotti,

baawaanal doom aadama.

²⁹ Ana ku xam ni aw xiin di firikoo,

ba dënu fettaxe xaymab Yàlla ba?

³⁰ Keey taal melaxam, mu dajal asamaan,

sàng xóotey géej.

³¹ Noonu lay saytoo xeet yi,

ba maye ñam wu ne gàññ.

³² Yaari loxoom lay ñebe melax gi,

dalal ko fa mu ko sant,

³³ kàddu yéene ab taw,

jur gi yég ne mu ngi dikk.

37

¹ Lii déy a rëccal sama fit,

muy tēf-tēfee fa mu sax.

² Dégluleena déglu dënoom gay randañ,

kàddu gay rëkke fa gëmminam,

³ muy riiral fépp fu asamaan tiim,

di fettaxal melaxam ba cati àddina.

⁴ Ca lay yëmmu,

dënoo kàddoom gu màgg,

te dootu téye melax yi,

li feek baatam di jib.

⁵ Yàllaay dënu kéemtaan,

di def kiraama yu nu wees.

⁶ Kee naan tawub yuur mu sóobal suuf,

di yebal taw ba ci waame yiy sóobe doole,

⁷ daldi téye loxol képp ku doon liggéey,

ngir képp ku mu sàkk xam jéfam;

⁸ Rabu àll duggi biir xunteem,

goori biir paxam,

⁹ ngélén bawoo néegam

sedd ba tukkee fa ngelawi bëj-gàннаar.

¹⁰ Yàllaay nokki, ndox way,

wali ndox rasu, ne kekk.

¹¹ Keey sēf xàmbaar, mu guux,

keey tasaare niir yi làmboo melaxam,

¹² ñu jargandalu ci ndigalam

di fexee sottal mboolem santaaneem

ci kaw àddina wërngal képp,

¹³ mu mel ni yet wu muy bantale waa àddinaam,

mbaa mu firndeele leen ko ngoram.

Ayóoba

- ¹⁴ Yaw Baay Ayóoba, teewlul lii,
neel tekk te jàngat kéemaani Yàlla yi.
- ¹⁵ Dangaa xam nu Yàlla di sosey niiram,
ba melaxal melax gi ci niiram?
- ¹⁶ Dangaa xam nu niir yiy ajoo ci jaww ji,
kiraamay ku buural xam-xam a ngoog!
- ¹⁷ Yaw mi say yére di tàng,
bu ngelawu bëj-saalum di upp, suuf ne tekk,
- ¹⁸ ndax yaa ko lal-le woon déndub asamaan,
mu dëgër ni weñ gu ñu xelli?
- ¹⁹ Xamal nu boog lu nuy wax Yàlla!
Dunu mana lay ndax ñàkka xam.
- ²⁰ Ndax dees koy yégal ne maay waaja wax?
Ana nit kuy ñaan sànkutey boppam?
- ²¹ Kenn manula xool jant bu ne ràññ,
gannaaw bu ngelaw walee niir yi ba mu set.
- ²² Bëj-gàннаar la leeru wurus di dikke,
booba Yàllaa làmboo darajaam ju raglu.
- ²³ Aji Man ji nu dul daj daa bare doole,
dëggu, bare njekk, du note.
- ²⁴ Moo tax ñu ragal ko,
faalewul kenn ku naw um xelam.

38

Aji Sax ji àddu na

- ¹ Ba loolu amee *Aji Sax ji àddoo fa ngélén la, ne Ayóoba:
- ² Ana koo doon, bay lëntal samay dogal,
di wax loo xamul dara?
- ³ Takkul boog te góor-góorlu,
ma laaj la, nga xamal ma.
- ⁴ Ana foo nekkoon ba may samp suuf?
Waxal su la ko sam xel mayee.
- ⁵ Ana ku dogal dayo ya, umpu la?
Ku tàllal buum, natte ko ko?
- ⁶ Ana fu kenu ya sampe?
Ak ku teg doju coll wa,
- ⁷ ba biddiwi njël sarxolleendoo,
goney Yàlla yépp xaacoondoo?
- ⁸ Ana ku tëjoon lafi buntu géej,
ba muy buccikoo xóote ya, fettax,
- ⁹ ba ma solal ko aw niir, mbubb,
laltaaye ko lëndëm,
- ¹⁰ dagg aw xélam, àppal ko kemu,
dogalee ko bunt bu tëje ràpp,
- ¹¹ ba ne ko: «Fii ngay yem, doo fi wees.

Ayóoba

Fii la say gannax di noppee buure»?

¹² Ana foo masa joxe suba ndigal,
ba xamal njël bérabam,

¹³ ngir mu jàppe cati àddina, ag leeram,
yèlèbe ca ñu bon ñi,

¹⁴ àddina mel ni ban bu ñu teg torluwaay,
tey saamandaay mbubb mu ñu suub,

¹⁵ ñu bon ñi, ñu xañ leen seenug leer,
ba loxo ba ñu xàcci woon damm?

¹⁶ Yaa àkki ba fa géej bënne?

Am yaa daagoo ruqi xóotey géej?

¹⁷ Dees laa won bunti ndee?

Am yaa gis bunt ya jëm lëndëmu njaniiw?

¹⁸ Dangaa ràññee yaatuwaayu suuf si?

Waxal, ndegam xam nga lii lépp!

¹⁹ Ana yoon wa jëm fa leer dëkke,

ak fa lëndëm màkkaanoo,

²⁰ ba nga man leena yóbbu fa ñu digaloo,
te ràññee seen yooni kër?

²¹ Xam nga ko moos, fekk na la juddu;

dund nga ay fani fan!

²² Yaa àkki ba fa mbàndi tawu yuur ya?

Am yaa gis mbàndi waamey donj yu sedd,

²³ ya may dencal jamonoy njàqare
ngir bésuub ndajem xare?

²⁴ Ana yoon wu jëm fa leer di tasaaroo?

Ak fu ngelawal penku di xàjjalikoo,

ba dajal suuf si?

²⁵ Ana ku xàllal waame,

ak ku sàkkal melax ak dënu aw yoon,

²⁶ di taw fu kenn newul,

ci màndiŋ mu nit amul,

²⁷ di suuxat gent bu maral,

ba saxal fam ñax?

²⁸ Ab taw daa am baay?

Ana ku geñoom sos toqi lay?

²⁹ Ana ku wasin ndox mu way,

ak ku jur layub asamaan bu sedd ba wow,

³⁰ ba wali ndox yi dëgër niw doj,

déndu géej fasu, ne kekk?

³¹ Yaay faste genn dëlloñ gu ndaw

gi ci digg asamaan?

Am yaay yiwi dëlloñ gu mag ga mu dendal?

³² Yaay def bu jotee, nga feeñal biddiww yi?

Am yaay wommat dëlloñu bëj-gànaar

ak njabootam gu sew?

Ayóoba

³³ Dangaa xam dogali yoon yi yor asamaan?

Am yaay saytu kilifteefam fi kaw suuf?

³⁴ Yaay yékkatil niir yi kàddug ndigal,
rekk waame sang la?

³⁵ Yaay yebal melax yi ñu dem,
melaxi, délsi, ne la: «Nu ngi, ak fan?»

³⁶ Ana ku yeb xel mu rafet cib dënn,
ak ku may ab xol dég-dég?

³⁷ Ana ku xareñ ba waññ niir yi?

Ak kuy jolal mbuusi asamaan,

³⁸ ba suuf di bàq, dankaloo,

defi donj, taqloo?

³⁹ Yaay rëbbal gaynde?

Am yaay reggal doomu gaynde

⁴⁰ ju goore biir paxam,
mbaa mu waafem ngeer, di tëroo?

⁴¹ Ana kuy xont baaxoñ,
fa doom yay wooye Yàlla wall,
di tërëf ndax ub xiif?

39

¹ Yaa xam jamono ju kéwéli tund di jur?

Am yaa gis fu kéwél di ame doom?

² Yaa lim weer yi muy ëmb,
am yaa xam fu njuram jote,

³ ba mu sukk, jur,
tàggook mititu matam,

⁴ ak fa doom jay leqlikook a màgg ci àll bi,
ba dem, te du délsi?

⁵ Ana ku yóbbu fasu àll, afal ko?

Ana ku yiwi mbaamu àll, wacc ko?

⁶ Moom mi ma jox màndij mi, mu dëkke,
ak jooru xorom, mu màkkaanoo?

⁷ Yéggul riirum taax,
déggul coowal dawalkat.

⁸ Tund yi lay wërem poram,
di fa seete gépp gàncax gu tooy.

⁹ Ndax nagu àll a lay nangoo liggéeyal?
Mbaa mu di la fanaanal ci sa ngédd?

¹⁰ Man ngaa takk nagu àll cim rijji,
ba mu topp la, rijjil lab tool?

¹¹ Yaa koy yaakaare dooleem ju bare,
ba dénk ko sab liggéey?

¹² Yaay yaakaar mu fatal la jiwu,

Ayóoba

jëlil la ko ca dàgga ja?

¹³ Bànjóolee ngi tēf-tēflu,
te xodd gën koy laaf.

¹⁴ Mooy wacci nenam fi suuf,
bàyyee ko tangooru suuf.

¹⁵ Xalaatul tãnk bu ci joggi
ak rabu àll wu ko dēggaate.

¹⁶ Day soxore doom yi ni lu mu jurul,
coonoom neen, yoonam.

¹⁷ Yàllaa ko xañ xam-xam,
te séddu ko xelum ràññee.

¹⁸ Waaye bu sàqee, ba sàqi,
faalewul fas ak gawaram.

¹⁹ Ndax yaa may aw fas, kàttan?
Am yaa solal ndodd ma, ciiriir?

²⁰ Am yaa koy tēbloo nim soccet,
bu fiiroo, fit rēcc?

²¹ Fas a ngi bége dooleem, di curpee xur wa,
riddi, dajeeek ngànaay.

²² Yégul tiitaange, ragalul,
dawul saamar.

²³ Mbarum fitt a ngay kesen-kesenji fa kawam,
fa xeej ak jaasi leroxatandoo,

²⁴ mu buure xadar, taxañ suuf si,
téyeetul boppam ndax liit ga jolli,

²⁵ mu feeloo ko coowal wakkan ya.

Fu sore lay xañtoo xare ba,
ak kàdduy njiiti xare,
ya riirandook xaacu ya.

²⁶ Ndax sam xel la céeliy daayaarloo,
ba firiy laafam, jëm běj-saalum?

²⁷ Am yaa sant jaxaay mu naaw ba fa kaw,
di tàgge kawte ya?

²⁸ Aw doj, mu màkkaanoo,
di fanaan kaw catu doj
wu ko kenn dul jote.

²⁹ Fa lay yeerom rēbbam,
di ko niire fu sore.

³⁰ Ku ñu bóom, ma nga fa teew,
doom yay xab deret ja.

40

¹ Aji Sax ji dellu ne Ayóoba:

² Yaw miy layook Aji Man ji, dangay diināt?
Yaw miy weranteek Yàlla, doo tontu?

³ Ayóoba àddu ne Aji Sax ji:

⁴ Man mi tekkiwul dara, nu ma lay tontoo?
Sama loxo laa ube sama gémmiñ.

⁵ Maa waxoon benn yoon, waxatuma;
maa tóllanti woon, dootu am.

Yàlla dëkk na Ayóoba

⁶ *Aji Sax ji daldi àddoo fa ngélén la, ne Ayóoba:

⁷ Takkul boog te góor-góorlu,
ma laaj la, nga xamal ma.

⁸ Sañ nga maa teg tooñ daal,
di ma sikkal, ba am dëgg?

⁹ Dangaa am dooley Yàlla,
mbaa kàddu guy dënu ni gosam?

¹⁰ Ràngool boog màggaay ak teddnga,
te làmboo dayook daraja.

¹¹ Yuril sa mer,
te xool képp ku bew, detteel ko,

¹² xoolal képp ku bew, torxal ko,
te dëggaate ku bon fa mu taxaw.

¹³ Boole leen làq biir suuf,
tëjleen ràpp fu làqu fa,

¹⁴ Kon déy man maa lay sargal,
muy ndam lu la sa doole may.

¹⁵ Beyemot rab wu réy^c waa ngii, maa ko sàkk, sàkk la,
ñax lay lekk niw nag.

¹⁶ Doole jaa ngoogu ca ndigg la,
kàttan ga laloo suuxi biir ba,

¹⁷ geen ga ne kàdd ni garabu seedar,
sidditi lupp ya ñabaloo,

¹⁸ yax ya di ponki xàñar,
cér ya mel ni yeti weñ.

¹⁹ Moo gëna yéeme ci li Yàlla sàkk,
te ki ko sàkk donḡ a koy boccil saamar.

²⁰ Xontam déy tund yee ko yor,
rabi àll yépp di foye fa wetam.

²¹ Keppaaru déem lay goore,
làqoo barax ak ban,

^c40.15 *rab wu réy wi* am na ñu jàpp ne léebéer la.

²² déem ya keral ko,
garabi tàkk ga yéew ko.
²³ Dex gu fees jaaxalu ko,
gannaxi Yurdan di ko talaata, mu ne tekk.
²⁴ Ana ku koy jàpp te muy xoole?
Ak ku koy nos, ba téye ko?

²⁵ Ninki-nànka^d nag yaa koy nappe oos?
Am yaay yeewe làmmiñ wa ag buum?

²⁶ Yaay nase wakkan ya ag buum?
Am yaay bëtt ñaam wa, we ca lonku?

²⁷ Xanaa ca la lay tinoo tinu,
di la lewetali kàddoom?

²⁸ Xanaa kon mooy digook yaw,
ngir nga def ko jaam ba fàww?

²⁹ Am yaa koy foye ni picc,
takkaal ko sa janq ji, ñu di ko seetaan?

³⁰ Dees na ko waxaaleendoo?
Am ay julaa koy séddoo?

³¹ Yaa koy jamati xepp a?
Am yaa koy xaañ xeeju nappkat?

³² Teg ko loxo, seet;
dootoo fàtte boobu xeex,
te doo ko dolleeti.

41

¹ Wii rab, yaakaar koo jàpp nax sa bopp la;
bu nee jaas, nga jóoru.

² Kenn ñàngul, ba sañ koo merloo.
Kon ana kuy taxaw fi sama kanam man?

³ Ana ku ma abal lenn ba ma war koo delloo?
Lépp lu mboolem asamaan tiim, maay boroom!

⁴ Rab wii, duma noppee waxtaaney céram,
kiraamay dooleem ak jekkaayu bindam.

⁵ Ana ku mana summib turkeem?
Ana ku mana bëtt kiiraayu ñaar-caam?

⁶ Ana ku koy ñaal,
ak sellam yu dajal te raglu?

⁷ Gannaaw gi ay sàppey pakk la,
di ab tay bu tēje ràpp,

⁸ dugglante, benn-benn,
ba ngelaw sax xaju ca,

⁹ xanaa ñu ne ñàpp, ku ne taq sa moroom,
te duñu teqlikoo.

^d40.25 *ninki-nànka* jii am na ñu jàpp ne jasig la.

Ayóoba

- ¹⁰ Bu tisee, melax ne ràyy,
mu xippi, nga ne fajar ay xapp-xappal.
¹¹ Jumi sawaraay tàkke ca gémmiñ ga,
ferñent ya jiitu,
¹² saxar di sël-sëlee ca wakkan ya,
mbete cóolóolu cin luy bax.
¹³ Ngelawal bakkanam jafal nay xal,
sawara ne jippét, tàkke ca gémmiñam.
¹⁴ Ndoddam la doole daloo,
te fu mu dëgmal tēbum tiitaange fa la.
¹⁵ Ay ndombo la der ba def, dānkalikoo,
ne këcc, ne degg.
¹⁶ Dënn baa nga dēgër niw doj,
ne këcc ni doju wolukaay.
¹⁷ Bu jógee, jambaar ñi tiit,
muy rajaxe, ñu jommi.
¹⁸ Nga jam ko saamar, du dugg;
xepp akug fitt akub xeej, noonu.
¹⁹ Weñ gu ñuul di ko saf um mboob,
xàñjar niru ko matt mu nēb.
²⁰ Ndawal xala dawloowu ko,
doju mbaq di ngooñ mu koy ñiiramtal.
²¹ Bolde di ko saf ñax gu wow,
ab xeej riir, def koy ree.
²² Lu mel ni tojitu xandeer a lal biir ba,
di rijji bañ bi.
²³ Mooy baxloo xóote yi, ni cin,
di fuural géej ni njaq lu garab xooje.
²⁴ Gannaawam ay def xàll wuy lerxat,
mbàmbulaan miy saf bijjaaw.
²⁵ Amul niruwaale fi kaw suuf,
mii mbindeef mu dul tiit.
²⁶ Képp ku réy, moo ko naa sutt, xool,
képp ku bew, muy sa buur.

42

Ayóoba tuub na

- ¹ Ba loolu amee Ayóoba àddu ne *Aji Sax ji:
² Xam naa ne lépp nga man;
du lenn loo tële.
³ Nee nga ma: «Ana koo doon,
bay lēntal samay dogal te xamoo?»
Maa wax moos te xawma lenn
ci kawtéef yu ma wees, ump ma.
⁴ Nee nga: «Déglul, maa lay wax.

Ayóoba

Ma laaj la, nga xamal ma.»

⁵ Dég-dégu nopp laa amoon ci yaw,
tey bët laa la teg.

⁶ Moo ma tax ne: «Wàqet, tuubi-ruubi,»
ba diwoo suuf akub dóom.

Yàlla leqli na Ayóoba

⁷ Gannaaw ba *Aji Sax ji waxee Ayóoba yooyu kàddu, Aji Sax ji dafa wax Elifas ma cosaanoo Teman, ne ko: «Sama xol tàng na ci yaw, yaak sa ñaari xarit yi, ndax waxuleen dëgg ci man ni sama jaam bi Ayóoba waxe. ⁸ Kon nag sàkkleen juróom ñaari yëkk, ak juróom ñaari kuuy. Ngeen dem ba ca sama jaam ba Ayóoba, joxe ko fa ⁹*saraxu rendi-dóomal, te Ayóoba ñaanal leen, ma seet ci moom ba bañ leena mbugale seenug ndof. Ndax waxuleen dëgg ci man ni sama jaam bi Ayóoba waxe.»

⁹ Ba loolu amee Elifas waa Teman ba, ak Bildàdd waa Suwa, ak Cofar waa Naama daldi dem, def la leen Aji Sax ji sant. Aji Sax ji seet ci Ayóoba. ¹⁰ Gannaaw ba Ayóoba ñaanalee xaritam ya, Aji Sax ji tijji wërsëgu Ayóoba. Aji Sax ji ful na ñaari yoon mboolem alalu Ayóoba. ¹¹ Ba loolu amee mboolemi bokkam, góor ak jigéen, ak mboolemi xameem ya woon, dikk bokk ak moom bernde ca këram. Ñu dëfal ko, mas-sawu ko ci bépp coono bu ko Aji Sax ji tegoon. Ku ci nekk jox ko dogu xalis ak jaarob wurus. ¹² Aji Sax ji nag barkeel mujug Ayóoba lu raw ndoortheem. Mu am fukki junniy gàtt ak ñeent (14 000), ak juróom benni junniy giléem (6 000), ak junniy lëkkey nag (1 000) yu muy rijjee, ak junniy mbaam yu jigéen (1 000). ¹³ Mu amaati juróom ñaari doom yu góor ak ñett ñu jigéen, ¹⁴ ka mag ca jigéen ña, mu tudde ko Yemima, ka ca topp di Keciya, ka ca toppaat di Keren Apug. ¹⁵ Mboolem jigéeni réew ma, amul ku rafete woon ni ñetti doomi Ayóoba yooyu. Seen baay nag sédd leen ndono lu tollook seen céri càmmiñ. ¹⁶ Gannaaw loolu Ayóoba dundaat na téeméeri at ak ñeent fukk (140). Gis na ay doomam, gis ay sëtam, ba muy ñeenti maas. ¹⁷ Ayóoba màggat na ba ñor xomm, doora dee.

